

C40-4514

瑜伽師地論卷第三十六

彌勒菩薩說

唐三藏沙門玄奘奉詔譯

本地分中菩薩地

初持瑜伽處自他利品第三之二

云何菩薩因攝果攝自利利他略說應知三因三果何等爲三一者異熟因異熟果二者福因福果三者智因智果云何異熟謂略有八一者壽量具足二者形色具足三者族姓具足四者自在具足五者信言具足六者大勢具足七者人性具足八者大力具足

C40

4514

129

B 64853



若諸菩薩長壽久住是名菩薩壽量具足形色端嚴
衆所樂見顏容姝妙是名菩薩形色具足生豪貴家
是名菩薩族姓具足得大財位有大朋翼具大僚屬
是名菩薩自在具足衆所信奉斷訟取則不行諂誑
僞斗秤等所受寄物終不差違於諸有情言無虛妄
以是緣故凡有所說無不信受是名菩薩信言具足
有大名稱流聞世間所謂具足勇健精進剛毅敏捷
審悉善戒種種技藝工巧業處展轉妙解出過餘人
由此因緣世所珍敬爲諸大衆供養恭敬尊重讚歎
是名菩薩大勢具足具丈夫分成就男根是名菩薩

人性具足爲性少疾或全無病有大堪能是名菩薩
大力具足云何異熟因謂諸菩薩於諸衆生不加傷
害遠離一切傷害意樂是名菩薩壽量具足因惠施
光明鮮淨衣物是名菩薩形色具足因於諸衆生捨
離僞慢是名菩薩族姓具足因於資生具有所匱乏
遊行乞匄諸衆生所隨欲惠施是名菩薩自在具足
因所言誠諦亦不好習乖離麤獷不相應語是名菩
薩信言具足因攝持當來種種功德於自身中發弘
誓願供養三寶及諸尊長是名菩薩大勢具足因樂
丈夫體狀婦女身深見過患由二因緣施他人性一

者女人樂女身者勸令厭離解脫女身二者丈夫將失男根方便護攝令不失壞及說正法令得男身是名菩薩人性具足因於諸衆生以身供事隨其所作如法事業皆往營助如已力能以其正法不以卒暴用能增長身心勢力餅飯糜等種種飲食施諸衆生是名菩薩大力具足因當知前說八種異熟以此所說八種爲因又此諸因略由三緣而得增長能感圓滿增上廣大異熟今起何等三緣一心清淨二加行清淨三田清淨若於無上正等菩提清淨意樂用彼善根決定迴向猛利意樂純厚廣大淨信修行見同

法者深生歡喜日夜剎那於多隨法隨尋隨伺名心清淨卽於其中長時數習無間所作常委所作他於此善若未受行讚美令受若已受行讚美令喜卽於如是所有善根安處建立名加行清淨當知略說能正發起如是加行及正安住此加行果名田清淨云何異熟果謂諸菩薩壽量具足故能於長時修習善品依自他利積集增長無量善根是名菩薩壽量具足果若諸菩薩形色具足故大衆愛樂衆愛樂故咸共歸仰如是形色可愛樂故一切大衆咸歸仰故凡所發言無不聽用是名菩薩形色具足果若諸菩薩

族姓具足故大衆尊敬供養稱讚衆所尊敬供養稱讚故於彼彼事勸諸衆生精勤修學無不敬用速疾修行無違無犯是名菩薩族姓具足果若諸菩薩自在具足故能以布施攝諸衆生速令成熟是名菩薩自在具足果若諸菩薩信言具足故能以愛語利行同事攝諸衆生速令成熟是名菩薩信言具足果若諸菩薩大勢具足故於諸衆生種種事業皆能營助施布恩德由此恩德感衆生心彼知恩故咸來歸仰所出言教速疾隨轉恭敬信用是名菩薩大勢具足果若諸菩薩人性具足故成就男根堪爲一切勝功

德器能於一切所作事業思擇一切所知境界都無所畏無礙而行一切有情於一切時皆來臻赴同共集會屏處露處言論同止受用飲食皆無嫌礙是名菩薩人性具足果若諸菩薩大力具足故於能引攝善法加行及能饒益有情加行皆無厭倦勇猛精進堅固精進速證通慧是名菩薩大力具足果若諸菩薩成就如是八種異熟具八種果能善饒益一切有情隨順生起一切佛法菩薩安住異熟果中於諸有情種種衆多利益事業自有力能及善安處所化有情彼於自事隨順而作如是乃名隨其所欲所作成

辨若諸菩薩自有力能不善安處所化有情彼於自
事不隨順作如是於他所作利益不名熾盛不名隨
順由是因緣不名能作他利益事若諸菩薩自無力
能而善安處所化有情彼於自事隨順而作如是於
他所作利益不名熾盛不名隨順由是因緣不名能
作他利益事是故菩薩要具二事方於有情所作利
益名爲熾盛名爲隨順由是因緣乃名能作他利益
事如是菩薩住異熟果自能成熟一切佛法亦能令
他於三乘道隨其所應速得成熟又能令自速證無
上正等菩提亦能令他已成熟者速得解脫由諸菩

薩安住八種異熟果中能使有情利益安樂是故一
切有情所處空無義利無始生死菩薩處之能令不
空有大義利云何爲福云何爲智謂略說福卽是三
種波羅蜜多一施波羅蜜多二戒波羅蜜多三忍波
羅蜜多智唯一種波羅蜜多謂慧波羅蜜多精進靜
慮波羅蜜多應知通二分一者福分二者智分若依
精進修行布施受護淨戒及修慈等四種無量如是
等類所有精進名爲福分若依精進習聞思修所成
三慧修蘊善巧修界善巧修處善巧修緣起善巧修
處非處善巧修能觀察苦爲真苦集爲真集滅爲真

滅道爲真道及於一切善不善法有罪無罪若劣若勝若黑若白并廣分別緣生法中皆能如實思擇觀察如是等類所有精進名爲智分若依靜慮修習慈等四種無量如是等類所有靜慮名爲福分若依靜慮能修如前精進中說蘊善巧等如是等類所有靜慮名爲智分如是福智略有六種一一分別應知無量云何福因云何智因略說應知福因智因總有三種一者於福於智能得能住能增長欲二者於福於智善能隨順無違背緣三者於福於智先已串習此中隨順無違背緣者謂顛倒緣不現在前不會遇性

不顛倒緣正現在前正會遇性若遇惡友倒說福智或倒作意顛倒而取名顛倒緣現前會遇與此相違所有白品當知名爲不顛倒緣現前會遇若於福智能得能住及能增長勤修習障遠離不起當知是名無違背緣若諸菩薩於此三種福智因中隨有所闕當知不能生福生智云何福果云何智果謂諸菩薩依止福故雖復長時流轉生死不爲極苦之所損惱又隨所欲能攝衆生爲作義利依止智故所攝受福是正非邪又能起作種種無量善巧事業乃至究竟當證無上正等菩提如是略說福果智果如其所應

當知四種品類差別復有無量應知此中若異孰體
若異孰因若異孰果如是一切皆依於福從福所生
福復依智從智所起是故二種於證無上正等菩提
雖俱是勝而於其中福爲最勝智爲無上若諸菩薩
於福於智隨闕一種決定不能證於無上正等菩提
是名菩薩因攝果攝自利利他云何菩薩現法後法
自利利他謂諸菩薩以如正理工巧業處士夫作用
積集財物卽於如是所集財物知量受用又先所造
可愛果業異孰果熟於現法中受用彼果又諸菩薩
於諸靜慮善迴轉者爲欲獲得現法樂住於現法中

依此靜慮不爲成立利他事故依此靜慮又諸如來
現法涅槃所有世間及出世間一切能得現法涅槃
諸有爲法是名菩薩現法自利如諸菩薩現法自利
如是菩薩所化有情由此獲得現法利益當知卽是
現法利他若於欲界能獲他世財寶具足自體具足
及能當生靜慮無色若生靜慮及無色中能獲他世
財寶具足自體具足若現法中與憂苦俱數數思擇
修習善因是名菩薩修習後法自利利他若諸菩薩
於現法中與喜樂俱修習當來財寶具足自體具足
所有善因及非退分靜慮無色一切等至是名菩薩

現法後法自利利他云何畢竟及不畢竟自利利他
謂於欲界財寶具足自體具足若因若果及諸異生
世間清淨若因若果是不畢竟自利利他若諸煩惱
一切永斷若諸所有八支聖道若此爲依獲得一切
世間善法是名畢竟自利利他由三因緣應知畢竟
及不畢竟一由自性故二由退不退故三由受用果
有盡無盡故由自性故者究竟涅槃名爲畢竟一切
有爲名不畢竟由退不退及受用果有盡無盡故者
八支聖道無有退故及受用果無有盡故名爲畢竟
其餘一切善有漏法由有退故及受用果有終盡故

名不畢竟如是菩薩十種自利利他若略若廣菩薩
隨力隨能當勤修學除此無有若過若增過去未來
所有一切已學當學自利利他亦皆唯有如此十種
自利利他除此無有若過若增

本地分中菩薩地

初持瑜伽處真實義品第四

云何真實義謂略有二種一者依如所有性諸法真
實性二者依盡所有性諸法一切性如是諸法真實
性一切性應知總名真實義此真實義品類差別復
有四種一者世間極成真實二者道理極成真實三

論
瑜伽師地論卷三十九
八
者煩惱障淨智所行真實四者所知障淨智所行真實云何世間極成真實謂一切世間於彼彼事隨順假立世俗串習悟入覺慧所見同性謂地唯是地非是火等如地如是水火風色聲香味觸飲食衣乘諸莊嚴具資產什物塗香華鬘歌舞妓樂種種光明男女承事田園邸店宅舍等事當知亦爾苦唯是苦非是樂等樂唯是樂非是苦等以要言之此卽如此非不如此是卽如是非不如是決定勝解所行境事一切世間從其本際展轉傳來想自分別共所成立不由思惟籌量觀察然後方取是名世間極成真實云

何道理極成真實謂諸智者有道理義諸聰敏者諸點慧者能尋思者能伺察者住尋伺地者具自辯才者居異生位者隨觀察行者依止現比及至教量極善思擇決定智所行所知事由證成道理所建立所施設義是名道理極成真實云何煩惱障淨智所行真實謂一切聲聞獨覺若無漏智若能引無漏智若無漏後得世間智所行境界是名煩惱障淨智所行真實由緣此爲境從煩惱障智得清淨於當來世無障礙住是故說名煩惱障淨智所行真實此復云何謂四聖諦一苦聖諦二集聖諦三滅聖諦四道聖諦

論
珠伽師地論卷三十一
九
房六
卽於如是四聖諦義極善思擇證入現觀入現觀已如實智生此諦現觀聲聞獨覺能觀唯有諸蘊可得除諸蘊外我不可得數習緣生諸行生滅相應慧故數習異蘊補特伽羅無性見故發生如是聖諦現觀云何所知障淨智所行真實謂於所知能礙智故名所知障從所知障得解脫智所行境界當知是名所知障淨智所行真實此復云何謂諸菩薩諸佛世尊入法無我入已善淨於一切法離言自性假說自性平等平等無分別智所行境界如是境界爲最第一真如無上所知邊際齊此一切正法思擇皆悉退還

不能越度又安立此真實義相當知卽是無二所顯所言二者謂有非有此宁有者謂所安立假說自性卽是世間長時所執亦是世間一切分別戲論根本或謂爲色受想行識或謂眼耳鼻舌身意或謂爲地水火風或謂色聲香味觸法或謂爲善不善無記或謂生滅或謂緣生或謂過去未來現在或謂有爲或謂無爲或謂此世或謂他世或謂日月或復謂爲所見所聞所覺所知所求所得意隨尋伺最後乃至或謂涅槃如是等類是諸世間共了諸法假說自性是名爲有言非有者謂卽諸色假說自性乃至涅槃假

說自性無事無相假說所依一切都無假立言說依
彼轉者皆無所有是名非有先所說有今說非有有
及非有二俱遠離法相所攝真實性事是名無二由
無二故說名中道遠離二邊亦名無上佛世尊智於
此真實已善清淨諸菩薩智於此真實學道所顯又
卽此慧是諸菩薩能得無上正等菩提廣大方便何
以故以諸菩薩處於生死彼彼生中修空勝解善能
成熟一切佛法及諸有情又能如實了知生死不於
生死以無常等行深心猒離若諸菩薩不能如實了
知生死則不能於貪瞋癡等一切煩惱深心棄捨不

能棄捨諸煩惱故便襍染心受諸生死由襍染心受
生死故不能成熟一切佛法及諸有情若諸菩薩於
其生死以無常等行深心猒離是則速疾入般涅槃
彼若速疾入般涅槃尚不能成熟一切佛法及諸有
情況能證無上正等菩提又諸菩薩由習如是空勝
解故則於涅槃不深怖畏亦於涅槃不多願樂若諸
菩薩深怖涅槃卽便於彼涅槃資糧不能圓滿由於
涅槃深怖畏故不見涅槃勝利功德由不見故便於
涅槃遠離一切清淨勝解若諸菩薩於其涅槃多住
願樂是則速疾入般涅槃彼若速疾入般涅槃則便

不能成熟佛法及諸有情當知此中若不如實了知
生死卽穢染心流轉生死若於生死深心厭離卽便
速疾入般涅槃若於涅槃深心怖畏卽於能證涅槃
資糧不能圓滿若於涅槃多住願樂卽便速疾入般
涅槃是諸菩薩於證無上正等菩提無大方便若能
如實了知生死卽無染心流轉生死若於生死不以
無常等行深心厭離卽不速疾入般涅槃若於涅槃
不深怖畏卽能圓滿涅槃資糧雖於涅槃見有微妙
勝利功德而不深願速證涅槃是諸菩薩於證無上
正等菩提有大方便是大方便依止最勝空性勝解

是故菩薩修習學道所攝最勝空性勝解名爲能證
如來妙智廣大方便又諸菩薩由能深入法無我智
於一切法離言自性如實知已達無少法及少品類
可起分別唯取其事唯取真如不作是念此是唯事
是唯真如但行於義如是菩薩行勝義故於一切法
平等平等以真如慧如實觀察於一切處具平等見
具平等心得最勝捨依止此捨於諸明處一切善巧
勤修習時雖復遭遇一切劬勞一切苦難而不退轉
速疾能令身無勞倦心無勞倦於諸善巧速能成熟
得大念力不因善巧而自貢高亦於他所無有祕吝

論
唯佛所說卷三十一
十一
第六

論

唯佛所說卷三十一

十一

第六

於諸善巧心無怯弱有所堪能所行無礙具足堅固
鉀鎧加行是諸菩薩於生死中如如流轉遭大苦難
如是如是於其無上正等菩提堪能增長如如獲得
尊貴殊勝如是如是於諸有情憍慢漸減如如證得
智慧殊勝如是如是倍於他所難詰諍訟誼雜語論
本惑隨惑犯禁現行能數觀察深心棄捨如如功德
展轉增長如是如是轉覆自善不求他知亦不希求
利養恭敬如是等類菩薩所有衆多勝利是菩提分
隨順菩提皆依彼智是故一切已得菩提當得今得
皆依彼智除此更無若劣若勝又諸菩薩乘御如是

無戲論理獲得如是衆多勝利爲自成孰諸佛法故
爲成熟他三乘法故修行正行彼於如是修正行時
於自身財遠離貪愛於諸衆生學離貪愛能捨身財
唯爲利益諸衆生故又能防護極善防護由身語等
修學律儀性不樂惡性極賢善又能忍他一切侵惱
於行惡者能學堪忍性薄瞋忿不侵惱他又能勤修
一切明處令其善巧爲斷衆生一切疑難爲惠衆生
諸饒益事爲自攝受一切智因又能於內安住其心
令心善定於心安住常勤修學爲淨修治四種梵住
爲能遊戲五種神通爲能成立利衆生事爲欲除遣

精勤修學一切善巧所生勞倦又性點慧成極真智
爲極真智常勤修學爲自當來般涅槃故修習大乘
又諸菩薩卽於如是修正行時於具功德諸有情所
常樂現前供養恭敬於具過失諸有情所常樂現前
發起最勝悲心愍心隨能隨力令彼除斷所有過失
於已有怨諸有情所常起慈心隨能隨力無諂無誑
作彼種種利益安樂令彼怨者意樂加行所有過失
及怨嫌心自然除斷於已有恩諸有情所善知恩故
若等若增現前酬報隨能隨力如法令其意望滿足
雖無力能彼若求請卽於彼彼所作事業示現殷重

精勤營務終不頓止彼所怖求云何令彼知我無力
非無欲樂如是等類當知名爲菩薩乘御無戲論理
依極真智修正加行以何道理應知諸法離言自性
謂一切法假立自相或說爲色或說爲受如前廣說
乃至涅槃當知一切唯假建立非有自性亦非離彼
別有自性是言所行是言境界如是諸法非有自性
如言所說亦非一切都無所有如是非有亦非一切
都無所有云何而有謂離增益實無妄執及離損減
實有妄執如是而有卽是諸法勝義自性當知唯是
無分別智所行境界若於諸法諸事隨起言說卽於

彼法彼事有自性者如是一法一事應有衆多自性何以故以於一法一事制立衆多假說而詮表故亦非衆多假說詮表決定可得謂隨一假說於彼法彼事有體有分有其自性非餘假說是故一切假說若具不具於一切法於一切事皆非有體有分有其自性又如前說色等諸法若隨假說有自性者要先有事然後隨欲制立假說先未制立彼假說時彼法彼事應無自性若無自性無事制立假說詮表不應道理假說詮表既無所有彼法彼事隨其假說而有自性不應道理又若諸色未立假說詮表已前先有色

性後依色性制立假說攝取色者是則離色假說詮表於色想法於色想事應起色覺而實不起由此因緣由此道理當知諸法離言自性如說其色如是受等如前所說乃至涅槃應知亦爾有二種人於佛所說法毗柰耶俱爲失壞一者於色等法於色等事謂有假說自性自相於實無事起增益執二者於假說相處於假說相依離言自性勝義法性謂一切種皆無所有於實有事起損減執於實無事起增益執妄立法者所有過失已具如前顯了開示於色等法實無事中起增益執有過失故於佛所說法毗柰耶甚

爲失壞於色等法實有唯事起損減執壞諸法者所
有過失由是過失於佛所說法毗柰耶甚爲失壞我
今當說謂若於彼色等諸法實有唯事起損減執卽
無真實亦無虛假如是二種皆不應理譬如要有色
等諸蘊方有假立補特伽羅非無實事而有假立補
特伽羅如是要有色等諸法實有唯事方可得有色
等諸法假說所表非無唯事而有色等假說所表若
唯有假無有實事旣無依處假亦無有是則名爲壞
諸法者如有一類聞說難解大乘相應空性相應未
極顯了密意趣義甚深經典不能如實解所說義起

不如理虛妄分別由不巧便所引尋思起如是見立
如是論一切唯假是爲真實若作是觀名爲正觀彼
於虛假所依處所實有唯事撥爲非有是則一切虛
假皆無何當得有一切唯假是爲真實由此道理彼
於真實及以虛假二種俱謗都無所有由謗真實及
虛假故當知是名最極無者如是無者一切有智同
梵行者不應共語不應共住如是無者能自敗壞亦
壞世間隨彼見者世尊依彼密意說言寧如一類起
我見者不如一類惡取空者何以故起我見者唯於
所知境界迷惑不謗一切所知境界不由此因墮諸

惡趣於他求法求苦解脫不爲虛誑不作稽留於法
於諦亦能建立於諸學處不生慢緩惡取空者亦於
所知境界迷惑亦謗一切所知境界由此因故墮諸
惡趣於他求法求苦解脫能爲虛誑亦作稽留於法
於諦不能建立於諸學處極生慢緩如是損減實有
事者於佛所說法毗柰耶甚爲失壞云何名爲惡取
空者謂有沙門或婆羅門由彼故空亦不信受於此
而空亦不信受如是名爲惡取空者何以故由彼故
空彼實是無於此而空此實是有由此道理可說爲
空若說一切都無所有何處何者何故名空亦不應

言由此於此卽說爲空是故名爲惡取空者云何復
名善取空者謂由於此彼無所有卽由彼故正觀爲
空復由於此餘實是有卽由餘故如實知有如是名
爲悟入空性如實無倒謂於如前所說一切色等想
事所說色等假說性法都無所有是故於此色等想
事由彼色等假說性法說之爲空於此一切色等想
事何者爲餘謂卽色等假說所依如是二種皆如實
知謂於此中實有唯事於唯事中亦有唯假不於實
無起增益執不於實有起損減執不增不減不取不
捨如實了知如實真如離言自性如是名爲善取空

者於空法性能以正慧妙善通達如是隨順證成道理應知諸法離言自性復由至教應知諸法離言自性如佛世尊轉有經中爲顯此義而說頌曰

以彼彼諸名 詮彼彼諸法 此中無有彼 是諸法法性

云何此頌顯如是義謂於色等想法建立色等法名卽以如是色等法名詮表隨說色等想法或說爲色或說爲受或說爲想廣說乃至說爲涅槃於此一切色等想法色等自性都無所有亦無有餘色等性法而於其中色等想法離言義性真實是有當知卽是

勝義自性亦是法性又佛世尊義品中說

世間諸世俗 牟尼皆不著 無著孰能取 見聞而不愛

云何此頌顯如是義謂於世間色等想事所有色等種種假說名諸世俗如彼假說於此想事有其自性如是世俗牟尼不著何以故以無增益損減見故無有現前顛倒見故由此道理名爲不著如是無著誰復能取由無見故於事不取增益損減於所知境能正觀察故名爲見聽聞所知境界言說故名爲聞依此見聞貪愛不生亦不增長唯於彼緣畢竟斷滅安

住上捨故名不愛又佛世尊爲彼散地迦多衍那作如是說散地比丘不依於地而修靜慮不依於水不依於火不依於風不依空處不依識處不依無所有處不依非想非非想處不依此世他世不依日月光輪不依見聞覺知不依所求所得不依意隨尋伺不依一切而修靜慮云何修習靜慮比丘不依於地而修靜慮廣說乃至不依一切而修靜慮散地比丘或有於地除遣地想或有於水除遣水想廣說乃至或於一切除一切想如是修習靜慮比丘不依於地而修靜慮廣說乃至不依一切而修靜慮如是修習靜

慮比丘爲因陀羅爲伊舍那爲諸世王并諸天衆遙爲作禮而讚頌曰

敬禮吉祥士 敬禮士中尊 我今不知汝

依何修靜慮

云何此經顯如是義謂於一切地等想事諸地等名施設假立各地等想卽此諸想於彼所有色等想事或起增益或起損減若於彼事起能增益有體自性執名增益想起能損減唯事勝義執名損減想彼於此想能正除遣能斷能捨故名除遣如是等類無量聖言名爲至教由此如來最勝至教應知諸法離言

自性問若如是者何因緣故於一切法離言自性而起言說答若不起言說則不能爲他說一切法離言自性他亦不能聞如是義若無有聞則不能知此一切法離言自性爲欲令他聞知諸法離言自性是故於此離言自性而起言說又諸愚夫由於如有所顯真如不了知故從是因緣八分別轉能生三事能起一切有情世間及器世間云何名爲八種分別一者自性分別二者差別分別三者總執分別四者我分別五者我所分別六者愛分別七者非愛分別八者彼俱相違分別云何如是八種分別能生三事謂若

自性分別若差別分別若總執分別此三分別能生分別戲論所依分別戲論所緣事謂色等想事爲依緣故名想言說所攝名想言說所顯分別戲論卽於此事分別計度非一衆多品類差別若我分別若我所分別此二分別能生一切餘見根本及慢根本薩迦耶見及能生一切餘慢根本所有我慢若愛分別若非愛分別若彼俱相違分別如其所應能生貪欲瞋恚愚癡是名八種分別能生如是三事謂分別戲論所依緣事見我慢事貪瞋癡事當知此中分別戲論所依緣事爲所依止生薩迦耶見及以我慢薩迦

耶見我慢爲依生貪瞋癡由此三事普能顯現一切世間流轉品法云何名爲自性分別謂於一切色等想事分別色等種種自性所有尋思如是名爲自性分別云何名爲差別分別謂卽於彼色等想事謂此有色謂此無色謂此有見謂此無見謂此有對謂此無對謂此有漏謂此無漏謂此有爲謂此無爲謂此是善謂此不善謂此無記謂此過去謂此未來謂此現在由如是等無量品類差別道理卽於自性分別依處分別種種彼差別義如是名爲差別分別云何名爲總執分別謂卽於彼色等想事我及有情命者

生者等假想施設所引分別於總多法總執爲因分別而轉於舍軍林飲食衣乘等假想施設所引分別如是名爲總執分別云何名爲我我所分別謂若諸事有漏有取長時數習我我所執之所積聚由宿串習彼邪執故自見處事爲緣所生虛妄分別如是名爲我我所分別云何名爲愛分別謂緣淨妙可意事境所生分別云何名爲非愛分別謂緣不淨妙不可意事境所生分別云何名爲彼俱相違分別謂緣淨妙不淨妙可意不可意俱離事境所生分別此中所說略有二種一者分別自性二者分別所依分別所

論
唯佛障地論卷三十六
三十一
廣

論
唯佛障地論卷三十六
三十一
廣

緣事如是二種無始世來應知展轉更互爲因謂過
去世分別爲因能生現在分別所依及所緣事現在
分別所依緣事既得生已復能爲因生現生世由彼
依緣所起分別於今分別不了知故復生當來所依
緣事彼當生故決定當生依彼緣彼所起分別云何
了知如是分別謂由四種尋思四種如實智故云何
名爲四種尋思一者名尋思二者事尋思三者自性
假立尋思四者差別假立尋思名尋思者謂諸菩薩
於名唯見名是名名尋思事尋思者謂諸菩薩於事
唯見事是名事尋思自性假立尋思者謂諸菩薩於

自性假立唯見自性假立是名自性假立尋思差別
假立尋思者謂諸菩薩於差別假立唯見差別假立
是名差別假立尋思此諸菩薩於彼名事或離相觀
或合相觀依止名事合相觀故通達二種自性假立
差別假立云何名爲四如實智一者名尋思所引如
實智二者事尋思所引如實智三者自性假立尋思
所引如實智四者差別假立尋思所引如實智云何
名尋思所引如實智謂諸菩薩於名尋思唯有名已
卽於此名如實了知謂如是名爲如是義於事假立
爲令世間起想起見起言說故若於一切色等想事

不假建立色等名者無有能於色等想事起色等想
若無有想則無有能起增益執若無有執則無言說
若能如是如實了知是名名尋思所引如實智云何
事尋思所引如實智謂諸菩薩於事尋思唯有事已
觀如一切色等想事性離言說不可言說若能如是
如實了知是名事尋思所引如實智云何自性假立
尋思所引如實智謂諸菩薩於自性假立尋思唯有
自性假立已如實通達了知色等想事中所有自性
假立非彼事自性而似彼事自性顯現又能了知彼
事自性猶如變化影像響應光影水月燄火夢幻相

似顯現而非彼體若能如是如實了知最甚深義所
行境界是名自性假立尋思所引如實智云何差別
假立尋思所引如實智謂諸菩薩於差別假立尋思
唯有差別假立已如實通達了知色等想事中差別
假立不二之義謂彼諸事非有性非無性可言說性
不成實故非有性離言說性實成立故非無性如是
由勝義諦故非有色於中無有諸色法故由世俗諦
故非無色於中說有諸色法故如有性無性有色無
色如是有見無見等差別假立門由如是道理一切
皆應了知若能如是如實了知差別假立不二之義

是名差別假立尋思所引如實智愚夫於此四如實智有所闕故不現前故便有八種邪分別轉能生三事能起一切有情世間及器世間謂由如是邪分別故起諸襍染起襍染故流轉生死於生死中常流轉故恒有無量隨逐生死種種生老病死等苦流轉不息菩薩依此四如實智能正了知八種分別於現法中正了知故今當來世戲論所攝所依緣事不復生起不生起故於當來世從彼依緣所趣分別亦不復生如是分別及依緣事二俱滅故當知一切戲論皆滅菩薩如是戲論滅故能證大乘大般涅槃於現法

中勝真實義所行處智極清淨故普能獲得一切自在謂諸菩薩於種種化獲得能化神通自在於種種變獲得能變神通自在普於一切所知境智皆得自在若欲久住隨其所樂自在能住若欲終歿不待害緣自在能歿由諸菩薩得如是等無量自在於諸有情最勝無上菩薩如是普於一切得自在故獲得五種最上勝利一者獲得心極寂靜由住寂靜故不由煩惱寂靜故二者能於一切明處無所罣礙清淨鮮白妙智見轉三者爲利諸有情故流轉生死無有歇倦四者善入一切如來密意言義五者所得大乘勝

解不可引奪不從他緣當知如是五種勝利有五種業一者菩薩成就最勝現法樂住能滅一切爲趣菩提精勤加行所生身心種種勞倦當知是名心極寂靜勝利之業二者菩薩普能成熟一切佛法當知是名於諸明處無礙清白微妙智見勝利之業三者菩薩普能成熟一切有情當知是名流轉生死無有厭倦勝利之業四者菩薩能正除遣所化有情隨所生起一切疑惑護持如來妙正法眼令得久住於能隱沒如來聖教像似正法能知能顯能正除滅當知是名善入如來密意言義勝利之業五者菩薩能摧一

切外道異論精進堅牢正願無動當知是名大乘勝解不可引奪不從他緣勝利之業如是菩薩所有一切菩薩所作皆爲如是五勝利業之所攝受云何一切菩薩所作謂自安樂而無襍染普能成熟一切佛法普能成熟一切有情護持如來無上正法摧伏他論精進勇猛正願無動當知如是四真實義初二下劣第三處中第四最勝

瑜伽師地論卷第三十六

音釋

匈

若太切 犢古猛切 匈乞求也 惡也 匈深明也

5
6
7
8
9
10
11
12
13
14
15
16
17
18
19
20
21
22
23
24
25

三藏沙門玄奘奉詔譯

佛地論卷第三十七

唐興居士包世杰施資刻此
金臺普安寺沙門
長洲徐道定陽鄭友刻
萬曆己亥春三月徑山家與庵識

瑜伽師地論卷第三十七

彌勒菩薩說

唐三藏沙門玄奘奉詔譯

本地分中菩薩地

初持瑜伽處威力品第五

云何諸佛菩薩威力當知略有三種一者聖威力謂佛菩薩得定自在依定自在隨其所欲一切事成心調柔故善修心故是名聖威力二者法威力謂諸勝法有廣大果有大勝利是名法威力此中法者即是六種波羅蜜多所謂布施乃至般若如是諸法有大

論

佛地論卷第三十七

七

威力名法威力三者俱生威力謂佛菩薩先集廣大
福德資糧證得俱生甚希奇法是名俱生威力又佛
菩薩如是威力品類差別復有五種一者神通威力
二者法威力三者俱生威力四者共諸聲聞獨覺威
力五者不共聲聞獨覺威力云何諸佛菩薩神通威
力謂六神通一者神境智作證通二者隨念宿住智
作證通三者天耳智作證通四者見生死智作證通
五者知心差別智作證通六者漏盡智作證通是名
神通威力云何諸佛菩薩神境智通謂佛菩薩神境
智通略有二種一者能變通二者能化通如是二種

品類差別各有多種云何能變神境智通品類差別
謂十八變一者震動二者熾然三者流布四者示現
五者轉變六者往來七者卷八者舒九者衆像入身
十者同類往趣十一者顯十二者隱十三者所作自
在十四者制他神通十五者能施辯才十六者能施
憶念十七者能施安樂十八者放大光明如是等類
皆名能變神境智通震動者謂佛菩薩得定自在心
調柔故善修心故依定自在普能震動寺館舍宅村
邑聚落城郭國土那洛迦世界傍生世界祖父世界
人世界天世界一四大洲一千世界二千世界三千

大千世界百三千大千世界千三千大千世界百千
三千大千世界乃至無量無數三千大千世界皆能
震動是名震動熾然者謂佛菩薩依定自在從其身
上發猛燄火於其身下注清冷水從其身下發猛燄
火於其身上注清冷水入火界定舉身炯然徧諸身
分出種種燄青黃赤白紅紫碧綠頗胝迦迦色是名熾
然流布者謂佛菩薩依定自在流布光明徧滿一切
寺館舍宅乃至無量無數世界無不充滿如前震動
是名流布示現者謂佛菩薩依定自在如其所樂示
彼一切諸來會衆沙門婆羅門聲聞菩薩天龍藥叉

健達縛阿素洛揭路荼緊捺洛牟呼洛伽人非人等
令悉現見下諸惡趣上諸人天復令現見諸餘佛土
及於其中諸佛菩薩乃至超過殑伽沙等諸佛國土
種種名聲所表佛土及彼土中其名如來悉令現見
亦爲宣說彼佛土名及如來名齊彼至此若復過彼
諸佛國土及諸如來隨其所欲乃至所欲皆令現見
亦爲宣說是名示現轉變者謂佛菩薩依定自在若
於其地起水勝解卽令成水如實非餘火風勝解亦
復如是若於其水起地勝解卽令成地如實非餘火
風勝解亦復如是若於其火起地勝解卽令成地如

實非餘水風勝解亦復如是若於其風起地勝解卽
令成地如實非餘水火勝解亦復如是若於一切起
餘勝解卽隨勝解如實非餘如於大種互相轉變色
香味觸當知亦爾若於草葉牛糞泥等起於飲食車
乘衣服嚴飾資具種種塗香華鬘勝解卽隨勝解如
實非餘若於沙石瓦礫等物起於末尼眞珠瑠璃蠶
貝璧玉珊瑚勝解卽隨勝解如實非餘若於諸山雪
山王等起金勝解卽隨勝解如實非餘若於一切起
餘勝解卽隨勝解如實非餘若於好色有情起惡色
勝解於惡色有情起好色勝解於俱非有情起好色

惡色勝解於俱有情起俱非勝解卽隨勝解如實非
餘如於好色惡色於具支節不具支節及肥瘦等當
知亦爾如是於餘所有自相可變色物起餘勝解皆
隨勝解一切轉變如實非餘是名轉變往來者謂佛
菩薩依定自在隨其所樂於諸牆壁山石等中縱身
往來無有滯礙廣說乃至往於梵世乃至至上至色究
竟天還來無礙或復傍於無量無數三千大千世界
若往若來皆無滯礙或運羸重四大種身或於遠處
作近勝解或如意勢速疾往來是名往來卷舒者謂
佛菩薩依定自在能卷一切雪山王等如一極微舒

一極微令如一切雪山王等是名卷舒衆像入身者
謂佛菩薩依定自在能以種種現前大衆及以一切
村邑聚落草木叢林諸山大地一切色像內已身中
令諸大衆各自知其身內是名衆像入身同類
往趣者謂佛菩薩依定自在或能往趣刹帝利衆同
其色類如彼形量似彼言音彼若以此名如是義亦
卽以此名如是義彼不以此名如是義亦不以此名
如是義然後爲其演說正法示現教導讚勵慶慰化
事旣終歛然隱沒沒後時衆迭相顧言不知沒者天
耶人耶如能往趣刹帝利衆如是往趣婆羅門衆若

沙門衆若長者衆若居士衆四天王天三十三天夜
摩天覩史多天化樂天他化自在天梵衆天梵光益
天大梵天少光天無量光天光音天少淨天無量淨
天徧淨天無雲天福生天廣果天無煩天無熱天善
現天善見天色究竟天當知亦爾是名同類往趣隱
顯者謂佛菩薩依定自在於大衆前百度千度或過
於是隱沒自身復令顯現是名隱顯所作自在者謂
佛菩薩依定自在普於一切諸有情界往來住等所
作事中皆自在轉令去卽去令住卽住令來卽來令
語卽語是名所作自在制他神通者謂佛菩薩依定



自在能制伏他所現神通如來神通普能制伏其餘一切具神通者所現神通如其所欲令事成辦究竟菩薩一生所繫或最後有所有神通除諸如來等類菩薩悉能制伏其餘一切具神通者所現神通諸餘菩薩所有神通除入上地等類菩薩悉能制伏其餘一切具神通者所現神通是名制他神通能施辯才者謂佛菩薩依定自在若諸有情辯才窮盡能與辯才是名能施辯才能施憶念者謂佛菩薩依定自在若諸有情於法失念能與憶念是名能施憶念能施安樂者謂佛菩薩依定自在說正法時與聽法者饒

益身心輕安之樂令離諸蓋專心聽法暫時方便而非究竟又令諸界互相違反能爲損害非人所行災癘疾疫皆得息滅是名能施安樂放大光明者謂佛菩薩依定自在以神通力身放光明或有一光往十方面無量無數諸世界中令惡趣等一切有情息彼衆苦或有一光往諸天界令大威德天龍藥叉健達縛阿素洛揭路茶緊捺洛牟呼洛伽等住自宮中蒙光覺悟皆來集會或有一光往十方面無量無數諸世界中令住他方世界菩薩蒙光覺悟皆來集會以要言之諸如來等能放無量無數品類種種光明能

作無量無數世界無量無數諸有情類無量無數利益之事是名放大光明當知如是一切能變神境智通品類差別一一分別無量無數由此神通能轉所餘有自性物令成餘物故名能變神境智通云何能化神境智通品類差別謂若略說無事而有是名爲化能以化心隨其所欲造作種種未曾有事故名能化神境智通此復多種或化爲身及化爲境或化爲語或化爲身及化爲境者化似自身或不相似化似他身或不相似又所化身若自若他或似不似唯能化作與根相似根所依處而非實根復能化作相似

境界謂飲食等末尼真珠璠璣寶等所有色香味觸所攝外資生具若彼相似若異於彼隨其所欲一切能化又所化身與已同類非一衆多種種差別或作天龍藥叉健達縛阿素洛揭路茶緊捺洛牟呼洛伽色像或作人傍生鬼那洛迦色像或作聲聞獨覺菩薩如來色像若所化身與菩薩身極相似者名所化身與自相似若不爾者名所化身非自相似又所化身與他同類亦有多種若作天身與彼天身極相似者名所化身與他相似若不爾者名所化身非他相似如作天身乃至佛身當知亦爾云何此中化作多

身謂佛菩薩於十方面無量無數諸世界中一時化
作種種形類能爲無量無數有情作利益事如是所
化種種形類於中或有諸佛菩薩雖滅度後由住持
力而故隨轉或有暫時作利益已化事便息又佛菩
薩或作化事唯令衆生親見而已如幻所作不堪受
用或復化作飲食衣服末尼眞珠璫瓔珞貝璧玉珊
瑚車乘等事與實無異如是所作財食衆具令諸衆
生常得受用是名化身及化境界或化爲語者或有
化語妙音相應或有化語廣音具足或有化語繫屬
於自或有化語繫屬於他或有化語無所繫屬或有

化語宣說正法言辭所攝或有化語誨責放逸言辭
所攝妙音相應者謂佛菩薩所說化語其聲深遠如
雲雷音其聲和雅如頻迦音能感衆心甚可愛樂又
此化語圓上微妙顯了易解樂聞無逆無依無盡廣
音具足者謂佛菩薩所說化語其聲廣大隨其所樂
無量種類天龍藥叉捷達縛阿素洛揭路荼緊捺洛
牟呼洛伽聲聞菩薩人非人等無量衆會一踰繕那
皆悉充滿以妙圓音隨類徧告又隨所樂小千世界
二千世界三千大千世界乃至十方無量無數諸世
界中若近若遠所有衆會以妙圓音隨類徧告於此

聲中出種種音爲諸衆生說種種法隨其所應各得
義利繫屬於自者謂佛菩薩所說化語於化自身出
種種音宣說正法誨責放逸繫屬於他者謂佛菩薩
所說化語於化他身宣說正法誨責放逸無所繫屬
者謂佛菩薩所說化語或於空中或於所化非佛法
上而有所說宣說正法言辭所攝者謂佛菩薩所說
化語開示正理令諸愚癡於種種法皆得悟解誨責
放逸言辭所攝者謂佛菩薩所說化語爲不愚癡獲
得淨信而放逸者責其放逸令生慚愧誨不放逸令
勤修學如是所說衆多化事略有三種化身化境及

以化語當知如是一切能化神境智通品類差別一
一分別無量無數如是二種諸佛菩薩神境智通能
辦二事一者示現種種神通引諸衆生入佛聖教二
者示現種種神通慧施無量受苦衆生衆多品類利
益安樂云何諸佛菩薩隨念宿住智通謂佛菩薩以
宿住智自能隨念已之宿住曾於如有有情類中我
如是名如經廣說亦能隨念他諸有情身等一切品
類差別如自隨念已事無異又能令他得宿住智能
自隨念前際所經若自若他身等一切品類差別曾
於如有有情類中我如是名乃至廣說如有有情轉

復令他得宿住智能自隨念一切宿住如前無異如是展轉令憶宿住皆如自已於現法中又能隨念諸微細事所有一切若少若多先所造作先所思惟皆無忘失又能隨念無間剎那次第所作無間斷故又能隨念有量有數宿住差別所知時劫可算數故又能隨念無量無數宿住差別所知時劫不可算數故以要言之此宿住智於如是處於如是類於如是量隨其所欲皆無礙轉如是名爲諸佛菩薩隨念宿住所攝威力又由隨念宿住智故憶念本生爲諸有情開示先世種種品類第一希有菩薩所行難行苦行

令於佛所生淨信故起恭敬故令於生死深厭離故又由此智憶念本事爲諸衆生開示種種先世相應業果異熟爲令妄計前際常論一分常論常見衆生破常見故云何諸佛菩薩天耳智通謂佛菩薩以淨天耳能於種種天聲人聲聖聲非聖聲大聲小聲辯聲非辯聲化聲非化聲遠聲近聲皆悉得聞聞天聲者若不作意下從欲界上至色究竟宮其中受生諸有情類種種音聲皆悉能聞若作意時過是已上諸世界聲皆亦能聞聞人聲者徧於一切徧四大洲受生有情種種音聲皆悉能聞聞聖聲者於諸如來聲



聞獨覺及諸菩薩若從彼聞展轉爲餘諸有情類宣說種種示現教導讚勵慶慰勸修諸善勸捨諸惡所有音聲皆悉能聞又於一切無染汙心受持讀誦論議決擇無倒諫誨爲作憶念教授教誡及餘所有善言善說能引義利種種音聲皆悉能聞如是等類名聞聖聲聞非聖聲者於諸有情虛妄離間邪綺麤獷生下惡趣生上天趣生傍人趣種種音聲皆悉能聞聞大聲者謂於大衆生聲大集會聲種種苦具所逼切聲大號哭聲相呼召聲大雷吼聲諸螺貝聲諸鼓角等種種音聲皆悉能聞聞小聲者下至耳語諸微

細聲皆悉能聞聞辯聲者於義易了種種音聲皆悉能聞聞非辯聲者於義難了種種音聲謂逢羅弭茶種種明呪風鈴樹響鸚鵡鳩鴿百舌鸚鵡命命鳥等所出音聲皆悉能聞聞化聲者謂於一切得心自在具神通者依神通力所化音聲皆悉能聞聞非化聲者謂於種種異彼音聲皆悉能聞聞遠聲者除佛菩薩所住聚落城邑等中所有音聲於餘乃至無量無數世界中聲皆悉能聞聞近聲者聞所餘聲云何諸佛菩薩見死生智通謂佛菩薩以超過人清淨天眼見諸有情死時生時好色惡色若劣若勝及於後際

生已增長諸根成熟身諸所作善惡無記差別而轉
又現見知諸光明色諸微細色諸變化色諸淨妙色
下至無間上至色究竟宮不由作意皆能見知若作
意時能見上下無量無數餘世界色亦能見徬無量
無數諸世界中一切諸色乃至能見彼彼佛土彼彼
如來安坐彼彼異類大會宣說正法顯然無亂又佛
菩薩以淨天眼普見十方無量無數諸有情類身之
所作淨不淨業既見彼已隨其所應隨其所宜施作
種種利益安樂以淨天眼普聞十方無量無數諸有
情類語之所作淨不淨業既聞彼已隨其所應隨其

所宜施作種種利益安樂是名略說諸佛菩薩天眼
天眼之所作業云何諸佛菩薩知心差別智通謂佛
菩薩以他心智徧知十方無量無數諸世界中他有
情類若有纏煩惱心若離纏煩惱心若有隨縛有隨
眠煩惱心若離隨縛離隨眠煩惱心又徧了知有染
心邪願心謂諸外道心及有愛染心又徧了知無染
心正願心謂與上相違心又徧了知劣心謂生欲界
諸有情類下至一切禽獸等心又徧了知中心謂生
色界諸有情類諸有心又徧了知勝心謂生無色
界諸有情類諸有心又徧了知樂相應心苦相應

論
三十一
三十一
心不苦不樂相應心又能以一知他心智於一有情
如是所有如是體性如是品類如是行相如是分齊
心起現前於一念頃並如實知又能以一知他心智
於多有情如是所有如是體性如是品類如是行相
如是分齊心起現前於一念頃並如實知又佛菩薩
此他心通知諸有情諸根勝劣知諸有情種種勝解
知諸有情種種界行隨其所應能正安處趣涅槃宮
種種正行當知是名此所作業云何諸佛菩薩漏盡
智通謂佛菩薩如實了知煩惱盡得如實了知若自
若他於諸漏盡已得未得如實了知若自若他所有

論
三十一
三十一
能得漏盡方便如能如實了知方便於非方便亦如
實知如實知他於漏盡得有增上慢如實知他於漏
盡得離增上慢又諸菩薩雖能如實了知一切漏盡
功德能證方便而不作證是故菩薩於有漏事及與
諸漏不速捨離雖行種種有漏事中而不染汙如是
威力於諸威力最爲殊勝又佛菩薩由漏盡智自無
染汙亦善爲他廣分別說壞增上慢當知是名此所
作業云何法威力謂布施威力乃至般若威力此布
施等諸法威力應知一一略有四相一者斷所對治
相二者資糧成熟相三者饒益自他相四者與當來

果相布施四相者謂諸菩薩修行慧施能斷慳吝施
所對治是名第一卽此慧施能作自己菩提資糧亦
卽能作布施攝事成熟有情是名第二施先意悅施
時心淨施已無悔於三時中心常歡喜以自饒益亦
能除他飢渴寒熱種種疾病所欲匱乏怖畏衆苦以
饒益他是名第三於當來世在在生處恒常富樂得
大祿位得大財寶得大朋黨得大眷屬是名第四是
名布施威力四相此外無有若過若增持戒四相者
謂諸菩薩受持清淨身語律儀能斷犯戒戒所對治
是名第一卽所受持清淨尸羅能爲自己菩提資糧

亦卽能作同事攝事成熟有情是名第二受持淨戒
捨離犯戒爲緣所生怖畏衆罪怨敵等事寢寤安樂
以自饒益又由淨戒無悔歡喜乃至心定以自饒益
受持淨戒不損惱他普施一切有情無畏以饒益他
是名第三由是因緣身壞已後生於善趣天世界中
是名第四是名持戒威力四相此外無有若過若增
忍辱四相者謂諸菩薩修行忍辱能斷不忍忍所對
治是名第一卽此忍辱能作自己菩提資糧亦卽能
作同事攝事成熟有情是名第二由此忍辱濟拔自
他大怖畏事饒益自他是名第三由是因緣能令菩

陸於當來世無多怨敵無多離隔無多憂苦於現法
中臨命終時心無憂悔身壞已後生於善趣天世界
中是名第四是名忍辱威力四相此外無有若過若
增精進四相者謂諸菩薩住勤精進能斷懈怠精進
所治是名第一卽此精進能作自己菩提資糧及所
依止亦卽能作同事攝事成熟有情是名第二勤精
進故得安樂住不爲一切惡不善法之所雜亂後後
所證轉勝於前倍生歡喜以自饒益勤修善品不以
身語損惱於他令他發生精進樂欲以饒益他是名
第三由此因力於當來世愛樂殊勝士夫功業是名

第四是名精進威力四相此外無有若過若增靜慮
四相者謂諸菩薩入靜慮時能斷煩惱語言尋伺喜
色想等隨煩惱靜慮所治是名第一卽此靜慮能
息已菩提資糧及所依止亦卽能作同事攝事成
熟有情是名第二現法樂住以自饒益其心寂靜最
極寂靜遠離貪愛於諸有情無損無惱以饒益他是
名第三由此因緣智得清淨能發神通於當來世生
淨天處得靜慮果是名第四是名靜慮威力四相此
外無有若過若增般若四相者謂諸菩薩具足妙慧
能斷無明慧所對治是名第一卽此般若能作自己

菩提資糧能以布施愛語利行同事攝事成熟有情
是名第二於所知事如義覺了能引廣大清淨歡喜
以自饒益普爲有情稱理說法令其獲得現法當來
利益安樂以饒益他是名第三由是因緣攝諸善根
能正所作於當來世能證二障離繫謂煩惱障離繫
及所知障離繫是名第四是名般若威力四相此外
無有若過若增是名法威力云何諸佛菩薩俱生威
力謂性能憶念諸本生事爲欲利益諸有情故不由
思擇於極長時種種猛利無間大苦悉能堪忍爲欲
利益諸有情故欣樂領受能辦有情利益事苦爲欲

利益諸有情故上生第四觀史多天盡觀史多壽量
而住有三勝事映彼受生諸天子衆一天壽量二天
形色三天名稱將欲下生入母胎時放大光明普照
世界於降母胎入住出位皆正了知既出胎已卽於
地上不待扶持而行七步自稱德號於初生時有大
威德天龍藥叉健達縛阿素洛揭路荼緊捺洛牟呼
洛伽等散以種種天妙華香持天伎樂上妙衣服幢
幡寶蓋殊勝供具而爲供養又以無上三十二大丈
夫相等莊嚴其身住最後有最後生中一切怨敵一
切魔軍一切災橫不能侵害坐菩提座以慈定力摧

伏衆魔一一支節皆悉備足那羅延力於稚童時不由習學自然善巧於諸世間工巧業處疾疾能入無師自然獨處三千大千世界證得無上正等菩提索訶界主大梵天王自然來下殷勤勸請哀愍世間宣說正法其定寂靜設大雲雷會無覺受安然不起爲菩薩時一切禽獸蠕動之類皆極仰信常來歸趣隨其所欲親附而住旣成佛已下至徬生亦來供養如彼獼猴獻清淨蜜世尊哀受歡喜舞躍龍雲常候洗便降雨若出遊行止而不落菩薩如是若坐樹下一切枝條並皆垂影隨陰其身曾無虧捨證菩提已於

六年中魔求其便竟不能得常俱行念每恒現前由此念故受相尋思生住滅等無不覺了又佛成就俱生威力或有見便饒益所攝或有賢聖行住所攝見便饒益所攝俱生威力者謂諸世間若見如來癩癩心亂還得本心逆胎得順盲者得視聾者能聽懷貪欲者得離貪纏懷瞋恚者得離瞋纏懷愚癡者得離癡纏如是等類當知是名見便饒益所攝俱生威力賢聖行住所攝俱生威力者謂佛菩薩常右脅臥如師子王雖現安處草葉等蓐一脅而臥曾無動亂一切如來應正等覺雖現睡眠而無轉側大風卒起不

動身衣行如師子步若牛王先舉右足方移左足隨
所行地高處便下下處遂高坦然如掌無諸礫石甃
瓦等物心專遠離而入聚落隨所入門門若狹小自
然高廣食所食時有粒皆碎無口不殫如是等類當
知是名賢聖行住所攝俱生威力般涅槃時大地震
動衆星晃耀交流而隕諸方一時欻然大熱徧滿虛
空奏天大樂如是無量甚希有事皆是如來俱生威
力非是神通威力所作如是名爲諸佛菩薩俱生威
力云何諸佛菩薩威力與聲聞獨覺有共不共略由
三相應知不共一者微細故二者品類故三者界故

諸佛菩薩於無量無數諸有情類及無量無數威力
方便如所應作諸利益事皆如實知無不能作是名
微細一切品類神通威力法威力俱生威力悉皆成
就是名品類以一切世界一切有情界爲威力境是
名爲界聲聞但以二千世界及有情界爲神通境獨
覺但以三千世界爲神通境何以故由彼唯爲調伏
一身而修正行非諸有情是故最極唯以一界爲神
通境除上所說所餘諸佛菩薩威力當知麤相與諸
聲聞獨覺等共如是諸佛菩薩威力聲聞獨覺尚不
能及何況所餘一切天人異生外道諸佛菩薩略有

三種神變威力一者神境神變所攝二者記說神變所攝三者教誡神變所攝當知此三如其所應攝入三種神通威力謂神境智通威力心差別智通威力漏盡智通威力

本地分中菩薩地

初持瑜伽處成熟品第六

云何成熟當知成熟略有六種一者成熟自性二者所成熟補特伽羅三者成熟差別四者成熟方便五者能成熟補特伽羅六者已成熟補特伽羅相云何成熟自性謂由有善法種子及數習諸善法故獲得

能順二障斷淨增上身心有堪任性極調善性正加行滿安住於此若遇大師不遇大師皆有堪任有大勢力無間能證煩惱障斷所知障斷譬如癱瘓熟至究竟無間可破說名爲熟又如瓦器熟至究竟無間可用說名爲熟又如衆果熟至究竟無間可噉說名爲熟如是有善法種子及數修習諸善法故獲得能順廣說乃至正加行滿無間能證二障清淨說名成熟如是名爲成熟自性云何所成熟補特伽羅謂所成熟補特伽羅略有四種一者住聲聞種性於聲聞乘應可成熟補特伽羅二者住獨覺種性於獨覺

乘應可成熟補特伽羅三者住佛種性於無上乘應
可成熟補特伽羅四者住無種性於往善趣應可成
熟補特伽羅諸佛菩薩於此四事應當成熟如是四
種補特伽羅是名所成熟補特伽羅云何成熟差別
謂此差別略有六種一諸根成熟二善根成熟三智
慧成熟四下品成熟五中品成熟六上品成熟諸根
成熟者謂壽量具足形色具足族姓具足自在具足
信言具足大勢具足人性具足大力具足此依身果
異熟具足爲所依故堪任發起勇猛精進修諸善法
於勤修集一切明處心無厭倦善根成熟者謂性薄

塵垢爲所依止性於諸惡不善法中心不樂入諸蓋
輕微尋思薄弱柔和正直隨順而取智慧成熟者謂
具足正念爲性聰敏有所堪任有大勢力能解善說
惡說法義能受能持能正通達具足成就俱生妙慧
依此妙慧有所堪任有大勢力能令其心究竟解脫
一切煩惱當知此中諸根成熟故解脫異熟障善根
成熟故能解脫業障智慧成熟故解脫煩惱障下品
成熟者謂二因緣下品成熟一者未久修習諸根善
根智慧成熟因緣未極增長二者串習下劣因緣中
品成熟者謂卽於此二種因緣隨一闕減隨一具足

上品成熟者謂二因緣俱無闕減云何成熟方便當知此有二十七種一者界增長二者現緣攝受三者趣入四者攝樂五者初發處六者非初發處七者遠清淨八者近清淨九者加行十者意樂十一者財攝受十二者法攝受十三者神通引接十四者宣說正法十五者隱密說法十六者顯了說法十七者下品加行十八者中品加行十九者上品加行二十者聽聞二十一者思惟二十二者修習二十三者攝受二十四者降伏二十五者自成熟二十六者請他成熟二十七者俱成熟界增長者謂本性善法種子具足

爲所依止先來串習諸善法故後後位中善法種子轉增轉勝生起堅住是名界增長現緣攝受者謂於現法中無倒說法無倒受持如理修行法隨法行當知界增長由先世因現在成熟現緣攝受由現在因現在成熟趣入者謂得淨信增上力故或有在家遠離惡行受持學處或趣非家遠離諸欲受持學處攝樂者謂依出離眾苦行迹及依遠離欲樂自苦二邊行迹於佛善說法毗奈耶真實聖教深生愛樂初發處者謂即最初於可厭法深生厭離於能成辦真實理義如實了知有勝功德而創趣入名初發處非初

發處者謂已趣入補特伽羅現成熟時常不捨離諸
佛菩薩諸明了處轉轉明了由此成熟轉轉增進遠
清淨者謂由懈怠或由違緣或經長時或經多生或
經多劫方能清淨近清淨者當知一切與此相違加
行者謂爲獲得自勝義利猛利樂欲爲所依故或怖
當來墮諸惡趣或怖現法他所譏毀於諸學處常勤
護持無間所作殷重所作業樂者謂於諸法正觀察
忍爲所依故於佛善說法毗奈耶不可引奪於他所
證深生信解信有功德爲所依故於三寶所及於獲
得自義利所深信無動財攝受者謂於一切飲食等

隨乏者施與一切飲食等物或於隨順飲食等
物有匱乏者施與隨順飲食等物法攝受者謂或宣
說正法施諸有情或開顯正義施諸有情神通引攝
者謂具神通者哀愍有情故或爲有情意樂清淨或
爲有情加行清淨增上力故示現種種神通變化欲
令有情見已聞已於佛聖教或當獲得意樂清淨或
當修行無倒加行彼諸有情由此神變引攝心故或
有獲得意樂清淨或有修行無倒加行宣說正法者
謂於獲得自勝義利若無堪能爲說正法伴助令彼
發生正行若有堪能爲說正法隨順令彼速證通慧

隱密說法者謂於嬰兒智慧有情隱覆廣大甚深義法爲說麤淺易可悟入易爲方便趣入處法顯了說法者謂於廣大智慧有情已善悟入聖教理者爲其開示廣大甚深道理處法下品加行者謂若遠離無間加行及殷重加行中品加行者謂或遠離無間加行或復遠離殷重加行於二加行隨闕一種上品加行者謂無間加行及殷重加行二俱相應聽聞者謂於佛語深生信解精勤聽聞受持讀誦契經等法思惟者謂居遠離樂思惟法推度其義解了決定修習者謂於止舉捨相正審觀察爲先深心欣樂修止舉

捨攝受者謂無染心以親教師及軌範師道理方便無有顛倒與作依止又卽於彼發起種種別供事行謂看病行給施如法衣服飲食諸坐臥具病緣醫藥資生具行除遣憂愁及惡作行除遣煩惱隨煩惱行如是等類當知皆名別供事行降伏者謂深防護自身襍染於毀犯者若犯下品慈心諫誨若犯中品慈心訶罰若犯上品慈心驅擯當知此中諫誨訶罰令彼及餘利益安樂驅擯一種若重攝受令彼及餘利益安樂若驅擯已不重攝受但令其餘利益安樂何以故餘若見彼毀犯因緣旣被驅擯便自防護不起

毀犯故自成熟者謂自宣說隨順正法令諸有情出不善處安立善處如自所說亦自修行法隨法行今諸有情同分隨轉勿使他人作如是說汝自不能出不善處安立善處云何於他教授諫舉爲作憶念他應於汝教授諫舉爲作憶念請他成熟者謂若有餘無量有情於彼發起上品愛敬或復有餘善知方便於說正法已善修學卽應勸請殷勤營助令其成熟無量有情俱成熟者謂具二種若自成熟若勸請他令其成熟由此所說二十七種成熟方便當知令前六種成熟差別圓滿所謂諸根成熟善根成熟智慧

成熟下品成熟中品成熟上品成熟云何能成熟補特伽羅謂略有六種菩薩住菩薩六地能成熟有情一者勝解行菩薩住勝解行地二者淨勝意樂菩薩住淨勝意樂地三者行正行菩薩住行正行地四者墮決定菩薩住墮決定地五者決定行正行菩薩住決定行正行地六者到究竟菩薩住到究竟地住無種性補特伽羅於往善趣種性而成熟時有數退轉有數應作安住種性補特伽羅於往三乘而成熟時無數退轉無數應作云何已成熟補特伽羅相謂諸聲聞先已串習諸善法故若時安住下品成熟爾時

便有下品欲樂下品加行猶往惡趣非於現法證沙
門果非於現法得般涅槃若時安住中品成熟爾時
便有中品欲樂中品加行不往惡趣於現法中證沙
門果非於現法得般涅槃若時安住上品成熟爾時
便有上品欲樂上品加行不往惡趣於現法中證沙
門果即於現法得般涅槃如說聲聞獨覺亦爾何以
故道與聲聞同種類故而此獨覺與諸聲聞有差別
者謂住最後有最後所得身無軌範師宿習力故修
三十七菩提分法究竟斷滅一切煩惱證阿羅漢故
名獨覺若諸菩薩住勝解行地名下品成熟住淨勝

意樂地名中品成熟住墮決定到究竟地名上品成
熟若時菩薩住下成熟爾時便有下品欲樂下品加
行猶往惡趣此盡第一無數劫邊際熾然無動極善
清淨覺品善法當知一切皆未相應若時菩薩住中
成熟爾時便有中品欲樂中品加行不往惡趣此盡
第二無數劫邊際熾然無動覺品善法已得相應極
善清淨覺品善法未得相應若時菩薩住上成熟爾
時便有上品欲樂上品加行不往惡趣此盡第三無
數劫邊際熾然無動極善清淨覺品善法當知一切
皆悉成就今於此中性淳厚故極猛盛故能有上品

廣大果故大勝利故名爲熾然不轉還故不退墮故常精進故名爲無動菩薩地中最無上故當知說名極善清淨當知此中若財攝受所作成熟若神通引攝所作成熟若隱密說法所作成熟若下品加行所作成熟若唯聽聞所作成熟如是五種所作成熟若於長時修習彼法尚爲下品況於少時修習彼法其餘一切成熟因緣所作成熟當知皆有三口道理謂若於彼下品修習成下成熟中品修習成中成熟上品修習成上成熟此下中上三品成熟當知一一復有三品於下品中有下下中下上三品成熟於中

品中有中下中中上三品成熟於上品中有上下上中上上三品成熟如是等類諸佛菩薩成熟有情當知展轉差別道理有無量品此中菩薩由前所說成熟因緣爲欲成熟自佛法故精勤修習諸根成熟善根成熟智慧成熟下品成熟中品成熟上品成熟又欲令他諸有情類補特伽羅乘三乘法而出離故往善趣故修習如是六種成熟
瑜伽師地論卷第三十七

音釋

炯

古迥切光明也

蠡貝

蠡落戈切貝博蓋切

欬

許勿切忽也

迭

徒結切更迭也

鵬

5
6
7
8
9
10
11
12
13
14
15
16
17
18
19
20
21
22
23
24
25

論
三
卷

鷓鷓呂支切鷓落侯切鷓鷓拉鳥各 蹠而克切蹠蟲動貌 癩癩都年切癩胡間切癩癩

也 狂病 癩癩於容切癩也 癰癰昨禾切小腫也

丹陽居士賀學易疏資刻此
金臺善安寺沙門
國受錄長洲徐善
亥宗三月經山慈
心

瑜伽師地論卷第三十八

彌勒菩薩說

唐三藏沙門玄奘奉詔譯

本地分中菩薩地

初持瑜伽處菩提品第七

云何菩提謂略說二斷二智是名菩提二斷者一煩惱障斷二所知障斷二智者一煩惱障斷故畢竟離垢一切煩惱不隨縛智二所知障斷故於一切所知無礙無障智復有異門謂清淨智一切智無滯智一切煩惱并諸習氣無餘永害徧一切種不染無明無

論
三
卷

餘永斷是名無上正等菩提一切煩惱并諸習氣畢
竟斷故名清淨智於一切界一切事一切品一切時
智無礙轉名一切智界有二種一者世界二者有情
界事有二種一者有爲二者無爲卽此有爲無爲二
事無量品別名一切品謂自相展轉種類差別故共
相差別故因果差別故界趣差別故善不善無記等
差別故時有三種一過去二未來三現在卽於如是
一切界一切事一切品一切時如實知故名一切智
無滯智者暫作意時徧於一切無礙速疾無滯智轉
不由數數作意思惟依一作意徧了智故復有異門

謂百四十不共佛法及如來無諍願智無礙解等是
名無上正等菩提百四十不共佛法者謂三十二大
丈夫相八十隨好四一切種清淨十力四無所畏三
念住三不護大悲無忘失法永害習氣一切種妙智
是諸佛法建立品中當廣分別如是菩提名爲最勝
七種最勝共相應故由是因緣於諸菩提最爲殊勝
云何名爲七種最勝一者所依最勝二者正行最勝
三者圓滿最勝四者智最勝五者威力最勝六者斷
最勝七者住最勝由諸如來以三十二大丈夫相等
莊嚴其身故名所依最勝由諸如來自利利他利益

安樂無量衆生哀愍世間令諸天人獲得義利利益
安樂而行正行故名正行最勝由諸如來無上無等
四種圓滿謂戒圓滿見圓滿軌則圓滿淨命圓滿皆
悉成就故名圓滿最勝由諸如來無上無等四無礙
解謂法無礙解義無礙解詞無礙解辯說無礙解
皆悉成就故名智最勝由諸如來無上無等如前所
說六種神通皆悉成就故名威力最勝由諸如來無
上無等一切煩惱習氣永斷及一切所知障永斷皆
悉成就故名斷最勝由諸如來多住無上無等三住
謂聖住天住梵住故名住最勝當知此中空無願無

相住及滅盡定住是名聖住四種靜慮四無色定是
名天住四種無量是名梵住於此三住中如來多住
四最勝住謂於聖住中多住空住滅盡定住於天住
中多住無動第四靜慮住於梵住中多住大悲住由
是如來晝夜六時晝三夜三常以佛眼觀察世間誰
增誰減我應令誰未起善根而種善根廣說乃至我
應令誰建立最勝阿羅漢果又諸如來所依最勝故
名大丈夫正行最勝故名大悲者圓滿最勝故名大
戒者及大法者智最勝故名大慧者威力最勝故名
大神通者斷最勝故名大解脫者住最勝故名多安

住廣大住者又諸如來略有十種功德名號隨念功德何等爲十謂薄伽梵號爲如來應正等覺明行圓滿善逝世間解無上丈夫調御士天人師佛薄伽梵言無虛妄故名如來已得一切所應得義應作世間無上福田應爲一切恭敬供養是故名應如其勝義覺諸法故名正等覺明謂三人行如經說止觀二品極善圓滿是故說名明行圓滿上升最極永不退還故名善逝善知世界及有情界一切品類染淨相故名世間解一切世間唯一丈夫善知最勝調心方便是故說名無上丈夫調御士爲實眼故爲實智故爲

實義故爲實法故與顯了義爲開導故與一切義爲所依故與不了義爲能了故與所生疑爲能斷故與甚深處爲能顯故令明淨故與一切法爲根本故爲開導故爲所依故能正教誡教授天人令其出離一切衆苦是故說佛名天人師於能引攝義利法聚於能引攝非義利法聚於能引攝非義利非非義利法聚徧一切種現前等覺故名爲佛能破諸魔大力軍衆具多功德名薄伽梵或有多劫無有一佛出現於世或有一劫有衆多佛出現於世彼彼十方無量無數諸世界中應知同時有無量佛出現於世何以故

於十方界現有無量無數菩薩同時發願同勤修集
菩提資糧若一菩薩於如是日於如是分於如是月
於如是年發菩提心願趣菩提卽於此日卽於此分
卽於此月卽於此年一切亦爾如一菩薩勇悍策勵
熾然精進一切亦爾於今現見此世界中多百菩薩
同時發願同修惠施同修淨戒同修忍辱同修精進
同修靜慮同修智慧況於十方無量無邊諸佛世界
又於十方現有無量無數三千大千佛土無二菩薩
同時修集菩提資糧俱時圓滿於一佛土竝出於世
一時成佛況有無量無數菩薩於一世界一時成佛

又不應言衆多菩薩同時修集菩提資糧俱時圓滿
前後相避次第成佛亦不應言一切菩薩皆不成佛
是故當知衆多菩薩同時修集菩提資糧俱圓滿者
於十方面無量無數隨其所淨空無如來諸佛國土
各別出世同時成佛由此道理多世界中決定應有
衆多菩薩同時成佛決定無有一佛土中有二如來
俱時出世何以故菩薩長夜起如是願隨令增長我
當獨一於無導首諸世界中爲作導首調伏有情令
脫衆苦令般涅槃如是長夜所起大願隨令增長攝
受正行得成滿故無二如來於一世界俱時出現又

一如來於一三千大千佛土普能施作一切佛事是
故第二如來出世無所利益又一如來於一佛土出
現於世令諸有情成辦自義極爲熾盛極爲隨順何
以故彼作是思一切世間唯一如來更無第二若於
此土化事已訖或往餘方或入滅度我等何從當修
梵行我等何從當聞正法如是思已發起深厚欲勤
精進速修梵行速聞正法若一佛土多佛出世彼於
所作不能速疾故一佛土一佛出世令諸有情成辦
自義極爲熾盛極爲隨順一切如來一切功德平等
平等無有差別唯除四法一者壽量二者名號三者

族姓四者身相一切如來於此四法有增減相非餘
功德又非女身能證無上正等菩提何以故一切菩
薩於過第一無數劫時已捨女身乃至安坐妙菩提
座曾不爲女一切母邑性多煩惱性多惡慧非諸稟
性多煩惱身多惡慧身能證無上正等菩提如是無
上正等菩提如說自性應如實知如說最勝應如實
知如說十種功德名號隨念功德應如實知如說出
現應如實知如說差別應如實知又此菩提爲不思
議超過一切尋思道故爲無有量無邊功德所集成
故爲無有上生成一切聲聞獨覺及與如來諸功德

故是故唯佛所證菩提最上最尊最妙最勝
本地分中菩薩地

初持瑜伽處力種性品第八

已說菩薩所應學處如是應學我今當說
唵柁南曰
勝解多求法 說法修行 正教授教誡

方便攝三業

若諸菩薩欲於菩薩所應學處精勤修學最初定應
具多勝解應求正法應說正法應正修行法隨法行
應正教授應正教誡應住無倒教授教誡方便所攝
身語意業云何菩薩具多勝解謂諸菩薩於其八種

勝解依處具足成就淨信爲先決定喜樂一者於三
寶功德勝解依處具足成就淨信爲先決定喜樂謂
於佛法僧真實功德具多勝解二者於佛菩薩威力
勝解依處具足成就淨信爲先決定喜樂謂於如前
所說威力具多勝解三者於真實義勝解依處具足
成就淨信爲先決定喜樂謂於如前所說真實義具
多勝解四者於因勝解依處具足成就淨信爲先決
定喜樂謂於種種如應所攝無顛倒因具多勝解五
者於果勝解依處具足成就淨信爲先決定喜樂謂
於種種如應所攝無顛倒果具多勝解六者於應得

義勝解依處具足成就淨信爲先決定喜樂謂於無
上正等菩提所應得義我有堪任定當能得具多勝
解七者於得方便勝解依處具足成就淨信爲先決
定喜樂謂於一切菩薩學道能得方便有此方便得
應得義具多勝解八者於善言善語善說勝解依處
具足成就淨信爲先決定喜樂謂於契經應頌記別
等法具多勝解於此八種勝解依處應知菩薩由二
因緣具多勝解一者多修勝解故二者積集猛利忍
故彼諸菩薩求正法時當何所求云何而求何義故
求謂諸菩薩以要言之當求一切菩薩藏法聲聞藏

法一切外論一切世間工業處論當知於彼十二分
教方廣一分唯菩薩藏所餘諸分有聲聞藏一切外
論略有三種一者因論二者聲論三者醫方論一切
世間工業處論非一衆多種品類謂金師鐵師末
尼師等工業智處如是一切明處所攝有五明處一
內明處二因明處三聲明處四醫方明處五工業明
處菩薩於此五種明處若正勤求則名勤求一切明
處諸佛語言名內明論此幾相轉如是乃至一切世
間工巧業處名工業明論此幾相轉謂內明論略二
相轉一者顯示正因果相二者顯示已作不失未作

論
諸佛師地論卷三十八
不得相因明論亦二相轉一者顯示摧伏他論勝利
相二者顯示免脫他論勝利相聲明論亦二相轉一
者顯示安立界相能成立相二者顯示語工勝利相
醫方明論四種相轉一者顯示病體善巧相二者顯
示病因善巧相三者顯示斷已生病善巧相四者顯
示已斷之病當不更生善巧相一切世間工業明論
顯示各別工巧業處所作成辨種種異相云何內明
論顯示正因果相謂有十種因當知建立無顛倒因
攝一切因或爲雜染或爲清淨或爲世間彼彼稼穡
等無記法轉云何十因一隨說因二觀待因三牽引

因四攝受因五生起因六引發因七定別因八同事
因九相違因十不相違因謂一切法名爲先故想想
爲先故說是名彼諸法隨說因觀待此故此爲因故
於彼彼事若求若又此名彼待因如觀待手故手
爲因故有執持業觀待足故足爲因故有往來業觀
待節故節爲因故有屈伸業觀待飢渴故飢渴爲因
故於諸飲食若求若取隨如是等無量道理應當了
知觀待因相一切種子望後自果名牽引因除種子
外所餘諸緣名攝受因卽諸種子望初自果名生起
因卽初種子所生起果望後種子所牽引果名引發

因種種異類各別因緣名定別因若觀待因若牽引
因若攝受因若生起因若引發因若定別因如是諸
因總攝爲一名同事因於所生法能障礙因名相違
因此障礙因若闕若離名不相違因當知相違略有
六種一語言相違謂有一類或諸沙門或婆羅門所
造諸論前後相違二道理相違謂爲成立諸所成立
諸所知義建立比量不與證成道理相應三生起相
違謂所生法能生緣闕障生緣會四同處相違謂明
闇貪瞋苦樂等法五怨敵相違謂毒蛇鼠狼猫狸鼯
鼠互爲怨敵惡知識等六障治相違謂修不淨與諸

欲修慈與瞋修悲與害修七覺支八聖道支與三
界繫一切煩惱於此義中正意唯取生起相違此一
切因二因所攝一能生因二方便因當知此中牽引
種子生起種子名能生因所餘諸因名方便因復有
四緣一因緣二等無間緣三所緣緣四增上緣當知
此中若能生因是名因緣若方便因是增上緣等無
間緣及所緣緣唯望一切心心所說由彼一切心及
心法前生開導所攝受故所緣境界所攝受故方生
方轉是故當知等無間緣及所緣緣攝受因攝如是
十因云何能令一切世間種種事轉云何能令雜染

事轉云何能令清淨事轉謂於世間種種稼穡墮諸
穀數世資生物所有種種名想言說謂大麥小麥稻
穀胡麻大小豆等卽此望彼種種稼穡爲隨說因如
言大麥持去持來若磨若置如是等類種種隨說如
說大麥餘小麥等當知亦爾觀待飢渴羸劣身住觀
待段食所有愛味於彼追求執取受用卽說彼法爲
觀待因由彼各別自種子故種種稼穡差別而生卽
說彼種子爲此牽引因地雨等緣能生於芽名攝受
因卽彼種子望所生芽名生起因芽莖葉等展轉相
續望彼稼穡若成若熟爲引發因從大麥種生大麥

芽大麥苗稼不生餘類如是所餘當知亦爾卽說彼
爲此定別因卽彼一切從觀待因至定別因同爲稼
穡而得成熟名同事因非彼稼穡隨闕一因而得成
熟是故一切和合說爲此同事因霜雹灾等諸障礙
法望彼滋稼爲相違因彼闕無障是諸滋稼不相違
因如是十因於餘世間種種事物隨其所應當知廣
如_如論說又於一切雜染緣起所有種種名想言
說謂無明行識名色廣說乃至老死愁悲憂苦擾惱
卽此望彼諸襍染法爲隨說因如言無明緣行乃至
生緣老死如是等類種種隨說觀待境界所有愛味

論
預佈即其說卷三十一
十二
於諸有支相續流轉卽彼望此諸雜染法爲觀待因
於現法中無明等法所有已生已長種子令此種子
望於餘生生老死等爲牽引因近不善士聞不正法
非理作意及先串習所引勢力生無明等名攝受因
無明等法各別種子各生起因從無明支乃至有支
展轉引發後相續望於餘生生老死等爲引發因
餘無明支及自種子乃至有支能生那落迦餘無明
支及自種子乃至有支能生餓鬼人天當知亦
爾卽此望彼諸雜染法各定別因卽彼一切從觀待
因至定別因各同事因此雜染法相違因者謂出世

間種性具足值佛出世演說正法親近善士聽聞正
法如理作意法隨法行及與一切菩提分法卽如所
說種種善法若闕若離是雜染法不相違因如是十
因應知能起一切有情一切雜染又於一切清淨品
法及滅涅槃所有種種名想言說卽此望彼諸清淨
法爲隨說因如言念住正斷乃至八聖道支無明滅
故行滅廣說乃至生滅故老死滅如是等類種種隨
說觀待諸行多過患故樂求清淨攝受清淨成滿清
淨彼望於此爲觀待因安住種性補特伽羅種性具
足能爲上晉證有餘依及無餘依二涅槃界彼望清

淨爲牽引因親近善士聽聞正法如理作意及先所作諸根成熟名攝受因種性所攝一切無漏菩提分法所有種子望彼一切菩提分法爲生起因卽自種子所生一切菩提分法漸次能證若有餘依若無餘依二涅槃界名引發因聲聞種性以聲聞乘能般涅槃獨覺種性以獨覺乘能般涅槃大乘種性以無上乘能般涅槃彼望清淨爲定別因若清淨品觀待因乃至定別因彼望清淨爲同事因種性不具足不值佛出世生諸無暇處不親近善士不聽聞正法不如理作意數習諸邪行彼望清淨爲相違因此相違因

若闕若離是名清淨不相違因若雜染品諸相違因當知卽是清淨法因若清淨品諸相違因當知卽是雜染法因如是現有雜染十因清淨十因過去未來曾當染淨皆亦如是一切唯有如是十因除此無有若過若增於此相中云何爲果謂略有五一者異熟果二者等流果三者離繫果四者士用果五者增上果諸不善法於諸惡趣受異熟果善有漏法於諸善趣受異熟果是名異熟果習不善故樂住不善不善法增修習善故樂住善法善法增長或似先業後果隨轉是名等流果八支聖道滅諸煩惱名離繫果若

諸異生以世俗道滅諸煩惱不究竟故非離繫果諸
有一類於現法中依止隨一工巧業處起士夫用所
謂農作商賈事王書畫算數占卜等事由此成辦諸
稼穡等財利等果是名士用果若眼識等是眼根增
上果乃至意識等是意根增上果衆生身分不散不
壞是命根增上果二十二根各各能起自增上果當
知一切名增上果二十二根增上作用如攝事分應
知其相菩薩於是內明所顯正因果相如實知已精
勤修習令處非處智力種性漸得清淨漸得增長云
何內明論顯示已作不失未作不得相謂諸有情自

所作業雖復作已經多百劫與果功能終無失壞亦
無不作或復異作而有異熟或異熟果菩薩於是內
明所顯已作不失未作不得相如實知已精勤修習
令其自業智力種性漸得清淨漸得增長菩薩云何
求聞正法謂諸菩薩於善說法應當安住猛利愛重
求聞正法如是略說於善說法安住猛利愛重之相
謂諸菩薩爲欲聽聞一善說法假使路由猛燄熾然
大熱鐵地無餘方便可得聞是善說法者即便發起
猛利愛重歡喜而入何況欲聞多善言義又諸菩薩
於自身分及於一切資身衆具飲食等事所有愛重

於欲聽聞諸善說法所有愛重以前愛重方後愛重
於百分中不及其一於千分中亦不及一於數分中
亦不及一於算分中亦不及一乃至鄔波尼煞曇分
諸善說法無有勞倦亦無厭足淨信深厚其性柔和
心直見直愛敬德故愛敬法故往法師所無難詰心
有敬重心無高慢心專爲求善非顯已德爲欲安立
自他善根不爲利養恭敬因緣菩薩具足如是功德
往法師所無雜染心無散亂心聽聞正法云何菩薩
無雜染心聽聞正法謂聽法時其心遠離貢高雜染

其心遠離輕慢雜染其心遠離怯弱雜染由六種相
其心遠離貢高雜染由四種相其心遠離輕慢雜染
由一種相其心遠離怯弱雜染謂聽法時應時而聽
殷重而聽恭敬而聽不爲損害不爲隨順不求過失
由此六相其心遠離貢高雜染又聽法時恭敬正法
恭敬說法補特伽羅不輕正法不輕說法補特伽羅
由此四相其心遠離輕慢雜染又聽法時不自輕慢
由此一相其心遠離怯弱雜染菩薩如是無雜染心
聽聞正法云何菩薩無散亂心聽聞正法謂由五相
一者求悟解心聽聞正法二者專一趣心聽聞正法

論
新加坡七命卷三十八
五
四八

三者聆音屬耳聽聞正法四者掃滌其心聽聞正法
五者攝一切心聽聞正法菩薩如是求聞正法菩薩
何故求聞正法謂諸菩薩求內明時爲正修行法隨
法行爲廣開示利悟於他若諸菩薩求因明時爲欲
如實了知外道所造因論是惡言說爲欲降伏他諸
異論爲欲於此真實聖教未淨信者令其淨信已淨
信者倍令增廣若諸菩薩求聲明時爲令信樂典語
衆生於菩薩身深生敬信爲欲悟入誥訓言音文句
差別於一義中種種品類殊音隨說若諸菩薩求醫
明時爲息衆生種種疾病爲欲饒益一切大衆若諸

菩薩求諸世間工業智處爲少功力多集珍財爲欲
利益諸衆生故爲發衆生甚希奇想爲以巧智平等
分布饒益攝受無量衆生菩薩求此一切五明爲令
無上正等菩提大智資糧速得圓滿非不於此一切
明處次第修學能得無障一切智智如是已說一切
菩薩正所應求如是而求爲此義求菩薩爲他說正
法時當何所說云何而說何義故說謂諸菩薩正所
應求卽是所說爲此義求卽爲此義而爲他說依二
種相應爲他說一者依隨順說應爲他說二者依清
淨說應爲他說云何依隨順說應爲他說謂諸菩薩

論
應當安住如法威儀而爲他說非不安住如法威儀
不爲無病處高坐者而說正法不爲坐者立說正法
不應居後爲前行者而說正法不爲覆頭而說正法
如別解脫經廣說應知何以故諸佛菩薩敬重法故
又於正法生尊重時令他於法起極珍貴恭敬聽聞
而不輕毀又爲一切說一切法無間而說又於正法
不生慳吝不作師拳又於正法如其文句次第而標
如其文句次第而釋如其次第分別其義又若引攝
義利法義應標應釋應廣分別非不引攝義利法義
又應示現所應示現又應教導所應教導又應讚勵

所應讚勵又應慶慰所應慶慰又依現比至教道理
而說正法非不依彼三量道理又所宣說順往善趣
又所宣說無亂易入而不隱密又所宣說應四聖諦
又處一切衆說正法時隨衆所應而爲宣說菩薩依
此十五種相諸隨順說普爲利他應如是說云何依
清淨說應爲他說謂諸菩薩於已有怨諸有情類應
住慈心爲說正法於行惡行諸有情類住利益心應
說正法於諸有樂有苦放逸下劣有情應當安住利
益安樂哀愍之心爲說正法不以嫉纏增上力故自
讚毀他以無染心不希利益恭敬讚頌爲他說法菩

薩依止此五種相諸清淨說普爲利他應如是說如是菩薩說正法相略有二十一者以時二者重法三者次第四者相續五者隨順六者歡喜七者愛樂八者悅豫九者欣勇十者不擯十一者應理十二者稱順十三者無亂十四者如法十五者順衆十六者慈心十七者利益心十八者哀愍心十九者不自讚毀他二十者不依利養恭敬讚頌菩薩如是應常爲他宣說正法云何菩薩法隨法行當知此行略有五種謂如所求如所受法身語意業無倒隨轉正思正修若佛世尊於彼諸法制身語意令不造作於此諸法

開身語意令其造作卽於如是二種法中身語意業無倒遠離無倒修證是名菩薩於諸法中身語意業無倒隨轉法隨法行云何菩薩於法正思謂諸菩薩獨居閑靜隨所聞法樂欲思惟樂欲稱量樂欲觀察先當遠離不思議處思惟彼法恒常思惟無間加行殷重加行而無慢緩是諸菩薩勇猛精進思惟法時於其少分以理觀察而隨悟入於其少分但深信解凡所思惟但依其義不依其文如實了知默說大說正能悟入最初思惟既悟入已數數作意令得堅固是諸菩薩由能遠離不應思議而思惟故其心不墜

迷悶錯亂由能恒常無間殷重加行無緩而思惟故
先來知義得正了知得正決了先已知義得無失壞
得不忘失由於少分以理觀察隨悟入故於隨正理
觀察法中不由他緣由於少分但信解故於極甚深
自少覺慧不能達法仰推如來言如是法是佛所行
非我境界如是於法不生誹謗不自損害遠離衰患
無諸過罪由諸菩薩思惟法時但依其義不依文故
於佛世尊一切所說密意語言能隨悟入由諸菩薩
普於一切默說大說得善巧故於真實義無物無法
能傾能動是諸菩薩正能悟入初思惟故能得先來

所未得忍是諸菩薩由卽於此已所得忍數數作意
令堅牢故能於其修隨順趣入菩薩由是八種相故
能正修行正思所攝法隨法行云何菩薩於法正修
當知此修略有四相一者奢摩他二者毗鉢舍那三
者修習奢摩他毗鉢舍那四者樂修習奢摩他毗鉢
舍那云何奢摩他謂諸菩薩由八種思善依持故於
離言說唯事唯義所緣境中繫心令住離諸戲論離
心擾亂想作意故於諸所緣而作勝解於諸定相令
心內住安住等住廣說乃至一趣等持是名奢摩他
云何毗鉢舍那謂諸菩薩由奢摩他熏修作意卽於

如先所思惟法思惟其相如理簡釋最極簡釋極簡
擇法廣說乃至覺明慧行是名毗鉢舍那云何修習
奢摩他毗鉢舍那謂諸菩薩於奢摩他毗鉢舍那無
間加行殷重加行恒常修習是名修習奢摩他毗鉢
舍那云何樂修習奢摩他毗鉢舍那謂諸菩薩卽於
如是止觀相中其心無動於無功用離諸加行任運
轉處攝受無亂是名樂修習奢摩他毗鉢舍那當知
此中是諸菩薩如如修習奢摩他毗鉢舍那如是如
是樂住奢摩他毗鉢舍那如如樂住奢摩他毗鉢舍
那如是如是奢摩他毗鉢舍那清淨如如奢摩他清

淨如是如是身安心安增長廣大如如毗鉢舍那清
淨如是如是若知若見增長廣大齊此名爲修所應
作謂於所依中應除遣麤重及於一切所知應清淨
知見如是一切修所作業菩薩由前四種修相皆能
成辦云何教授當知教授略有八種謂諸菩薩或三
摩地爲依止故或於長時共彼住故於彼慈悲欲爲
教授或由其餘諸菩薩衆或由如來爲作教授於教
授時先當審諦尋思其心如實了知尋思如實了知
心已尋思其根如實了知尋思如實了知根已尋思
意樂如實了知尋思如實了知尋思如實了知尋思

了知尋思如實知隨眠已如其所應隨其所宜示現
種種所趣入門令其趣入謂或修不淨或復修慈或
修種種緣性緣起或修界差別或修阿那波那念如
其所應隨其所宜示現種種所趣入門令趣入已爲
說能治常邊邪執處中之行爲說能治斷邊邪執處
中之行令其除捨未作謂作未得謂得未觸謂觸未
證謂證諸增上慢如是菩薩八種教授當知略說三
處所攝云何三處一未住心者爲令住故令於所緣
無倒係念二心已住者爲令獲得自義利故爲其宣
說正方便道三於自所作未究竟者令捨中間所有

畱難若知彼心根意樂隨眠已如其所應隨其所宜
示現種種所趣入門令其趣入當知是名未住心者
爲令住故令於所緣無倒係念若爲宣說能治斷常
二邊邪執處中之行當知是名心已住者爲令獲得
自義利故爲其宣說正方便道若令除捨未作謂作
廣說乃至未證謂證諸增上慢當知是名於自所作
未究竟者令捨中間所有畱難如是三處當知能攝
八種教授如是菩薩或由從他得正教授或由施他
無倒教授能令所餘八力種性漸得清淨漸得增長
謂靜慮解脫等持等至智力種性諸根勝劣智力種

性種種勝解智力種性種種界智力種性徧趣行智力種性宿住隨念智力種性死生智力種性漏盡智力種性云何教誡當知教誡略有五種一者遮止有罪現行二者開許無罪現行三者若有於所遮止開許法中暫行犯者如法諫悔四者若有於彼法中數數輕慢而毀犯者以無染濁無有變異親善意樂如法呵擯與作憶念五者若有於所遮止開許法中能正行者慈愛稱歎真實功德令其歡喜當知是名略說菩薩五種教誡所謂遮止開許諫悔呵擯慶慰云何菩薩方便所攝身語意業當知略說菩薩所有四

種攝事是名方便如世尊言菩薩成就四種攝事所攝方便方名菩薩復何因緣唯四攝事說名方便謂諸菩薩略由如是攝事所攝四種方便於諸有情普能攝受調伏成熟除此無有若過若增何等名爲四種方便一隨攝方便二能攝方便三令人方便四隨轉方便若諸菩薩先行布施當知是名隨攝方便何以故先以種種財物布施饒益有情爲欲令彼聽受所說奉教行故若諸菩薩次行愛語於彼彼處有愚癡者爲欲除彼所有愚癡令無餘故令其攝受瞻察正理如是愛語當知名爲能攝方便若諸菩薩知彼

有情攝受瞻察正道理已次行利行拔彼有情出不善處於其善處勸導調伏安處建立如是利行當知名爲令人方便若諸菩薩如是方便令諸有情得趣入已最後與其於正事業同共修行令彼隨轉由是因緣令所化者不作是說汝自無有圓滿淨信圓滿尸羅圓滿惠捨圓滿智慧何賴於善勸導於他諫悔呵擯與作憶念是故菩薩所行第四同事攝事當知是名隨轉方便如是菩薩四種方便若攝若別所攝身業語業意業是名方便所攝三業於諸有情能正攝受調伏成熟

瑜伽師地論卷第三十八

音釋

鼯弦鷄切鵠波尼煞曇

梵語也此云數之極鵠安古切煞山畏切

丹陽居士賀學易施資刻此

瑜伽師地論第三十八卷

圓曼對長洲徐善書

萬曆己亥春三月徑山寂暎庵識

瑜伽師地論卷第三十九

彌勒菩薩說

唐三藏沙門玄奘奉詔譯

本地分中菩薩地

初持瑜伽處施品第九

復次菩薩次第圓滿六波羅蜜多已能證無上正等
菩提謂施波羅蜜多戒波羅蜜多忍波羅蜜多精進
波羅蜜多靜慮波羅蜜多慧波羅蜜多云何菩薩施
波羅蜜多嗔陀南曰

自性一切難 一切門善士 一切種遂求



二世樂清淨 如是九種相 是名略說施
謂九種相施名爲菩薩施波羅蜜多一自性施二一
切施三難行施四一切門施五善士施六一切種施
七遂求施八此世他世樂施九清淨施云何菩薩自
性施謂諸菩薩於自身財無所顧惜能施一切所應
施物無貪俱生思及因此所發能施一切無罪施物
身語二業安住律儀阿笈摩見定有果見隨所希求
卽以此物而行惠施當知是名菩薩自性施云何菩
薩一切施謂一切者略有二種一內所施物二外所
施物若諸菩薩但捨己身是名唯施內所施物若諸

菩薩爲愍食吐活命衆生數數食已吐所飲食而施
與之是名雜施內外施物若諸菩薩除上所說施餘
一切所應施物是名唯施外所施物又諸菩薩略由
二相以自內身施來求者一總求身者以身施彼隨
所欲爲繫屬於彼隨順於彼譬如有人爲衣食故強
自爲他而作僕使如是菩薩無愛染心但爲速證最
勝善提但爲衆生利益安樂但爲布施波羅蜜多速
圓滿故以身施彼隨所欲爲繫屬於彼隨順於彼二
別求手足頭目支節血肉筋骨乃至髓者隨其所欲
一切施與又諸菩薩亦由二相以外施物施諸衆生

一求受用者恣彼所須如其所樂隨意受用二求自在者一切斷心竝皆施與又諸菩薩非無差別以一切種一切內外所有施物施諸衆生是諸菩薩以其種種內外施物於諸衆生或有施與或不施與云何施與云何不施謂諸菩薩若知種種內外施物於彼衆生唯令安樂不作利益或復於彼不作安樂不作利益便不施與若知種種內外施物於彼衆生定作利益不定安樂或復於彼定作利益定作安樂即便施與如是略說菩薩應施不應施已次當廣辯謂諸菩薩若有來求共爲伴侶欲作非理逼迫損害誑惑

於他便不以身而施於彼隨所欲爲繫屬於彼隨順於彼由諸菩薩寧於百反千反或百千反捨自身命施諸衆生終不隨他敎命稱悅彼情於諸衆生非理逼迫損害誑惑若諸菩薩於所行施意樂清淨見有無量利衆生事正現在前設有來求自身支節不應施與何以故非彼菩薩於所行施意樂不淨心生退弱作是念言此應可施此不可施此應施與此不應與故彼菩薩爲令意樂得清淨故須捨現前利衆生事而施身分由彼意樂已清淨故不應棄捨正現在前利衆生事而施身分又諸菩薩若魔衆天懷惱亂

心現前來乞身分支節不應分碎支節施與何以故
勿彼當獲上品過罪及損害故如魔衆天如是於彼
所使衆生當知亦爾或有衆生癡狂心亂來求菩薩
身分支節亦不應碎支節施與何以故由彼不住自
性心故不爲義利而求乞故其心狂亂不自在故空
有種種浮妄言說是故不應施彼身分除上所說與
上相違來求菩薩身支節者隨其所欲應施彼身隨
所欲爲繫屬於彼隨順於彼或分支節而施與之當
知是名菩薩於內所可施物或應施與或不應與又
諸菩薩於外施物若有衆生來求毒火刀酒等物或

爲自害或爲害他卽不應施若有衆生來求毒火刀
酒等物或自饒益或饒益他是卽應施又諸菩薩不
以屬他非同意物而行惠施又諸菩薩不行媒媾以
他妻妾而行布施又諸菩薩不以有蟲飲食等物而
行惠施又諸菩薩若有衆生來求種種能引戲樂能
引無義所施之物不應施與何以故若施彼時雖暫
令彼於菩薩所心生歡喜而復令彼廣作種種不饒
益事謂因施故令彼多行憍逸惡行身壞已後墮諸
惡趣若有種種戲樂等具雖復施與不令衆生墮諸
惡趣亦不增長諸不善根菩薩爲欲令彼衆生因此

所施戲樂等具攝受饒益心生淨信易可化導易可成孰隨彼所求悉皆施與是諸菩薩若有來求諸戲樂事何者應施何者不施謂諸菩薩終不施人捕獵等法又於雜穢諸祠祀中作大方便多集衆生損害其命獲無量罪於彼祠祀終不自作亦不教他亦不於彼諸天寺中殺羊祠祀若有來求或水或陸無量衆生所依止處爲欲殺害彼生命故菩薩知已終不施與若有來求罩羅罝弼爲害衆生及爲習學皆不施與若有怨家來求讎隙爲欲呵罵縛戮殺害奪財治罰終不施與以要言之所有一切逼迫損害他諸

有情戲樂等具有來求者是諸菩薩皆不施與若復種種象馬車輿衣服莊嚴珍妙飲食習歌舞等及諸樂器塗飾香鬘珍玩衆具園林樓觀舍宅侍女習學種種工巧業處如是一切戲樂等具爲欲令其於菩薩所因此發起清淨信心有來求者悉皆施與又諸菩薩若有病者來求非量非宜飲食亦不施與若有衆生食飽滿已性多饒嗜數復來求珍妙飲食亦不施與若諸衆生愁憂所逼求欲殺害毆擊自身食毒墜巖投淵赴火皆悉不應施其所欲又諸菩薩若有來求父母師長定不應施何以故以諸菩薩於其父

母尊重師長乳哺養育微有恩者於長夜中常思頂戴不生厭倦恒持自身繫屬隨順任所屠害捶縛貨賣尚自不敢竊懷施心何況顯然施來求者又諸菩薩若作國王灌頂自在統領方域於自國界所有僚庶終不抑奪取餘妻子而轉施餘唯持村邑聚落川土或全或分以用布施而告彼曰如我恩化汝亦宜然又諸菩薩於自妻子奴婢僕使親戚眷屬若不先以正言曉喻令其歡喜終不彊逼令其憂惱施來求者雖復先以正言曉喻令其歡喜生樂欲心而不施與怨家惡友藥又羅刹凶暴業者不以妻子形容輒

弱族姓男女施來求者令作奴婢又諸菩薩若有上品逼惱衆生樂行種種暴惡業者來求王位終不施與若彼暴惡補特伽羅先居王位菩薩有力尚應廢黜況當施與又諸菩薩終不侵奪父母妻子奴婢僕使親戚眷屬所有財物持用布施亦不逼惱父母妻子奴婢僕使親戚眷屬以所施物施來求者又諸菩薩以其正法以無卒暴積集財物而行惠施不以非法不以卒暴亦不逼迫損惱於他而行惠施又諸菩薩若在諸佛聖敎出家終不違越所有學處而行惠施又諸菩薩行布施時普於一切有情之類起平等

心住福田想而行惠施終不分別怨親中庸有得有失劣等勝品有苦有樂品類差別又諸菩薩如先所說如先所許終無減少施來求者唯有施彼或等或增又諸菩薩終無先許勝妙財物後施下劣唯有先許下劣財物若有勝妙後施勝妙又諸菩薩不以異意不以憤怒撓濁之心而行惠施又諸菩薩終不施已而自稱讚數數告言我於汝所曾行如是如是惠施攝受長養濟拔於汝又諸菩薩於卑賤者行布施時尚無不敬撩擲而與況於有德又諸菩薩若來求者安住種種毀犯邪行掉舉躁擾不自防護專行罵

詈瞋忿呵責終不於彼暫起邪行帶厭倦心而行惠施唯卽於彼了知爲諸煩惱所媚令改本性深更安住憐愍之心而行惠施又諸菩薩不由惡見妄有執取而行惠施謂如廣大暴惡祠祀不計殺生布施爲法亦不妄取吉祥瑞應相應相狀而行布施又諸菩薩終不妄計唯一切種極善清淨而行惠施卽是世間及出世間離欲清淨唯審了知所行布施但是離欲清淨資糧又諸菩薩不觀其果而行布施一切布施皆爲迴向速證無上正等菩提又諸菩薩如實了知一切品類所行布施一切品類施果異熟深生信

金
一
佛
七
九

解不由他緣非他所引而行布施謂施飲食能感大力施諸衣服能感妙色施諸車乘能感快樂施諸燈明能感淨眼如是等類廣說應知又諸菩薩不爲怖畏自身貧窮而行布施唯由悲愍衆生意樂而行布施又諸菩薩於來求者終不施與不合儀物謂施出家者餘殘飲食或諸便穢洩唾變吐膿血不淨所雜所染又不告白不令覺知如棄捨法施糜飯等謂不食葱者施以葱襍葱染飲食不食肉者施以肉雜肉染飲食不飲酒者施以酒雜酒染飲食或復處置不合儀式所有事業而行布施如是等類不合儀施菩

薩不爲又諸菩薩不令求者數數來求往還親附隨順繫屬稽留疲倦然後方施唯暫來求即便施與又諸菩薩不依世間名聲讚頌而行布施不依於他反報恩德而行布施不依帝釋魔王輪王自在等果而行布施亦復不爲誑誘他故而行惠施謂欲令他國王大臣城邑聚落諸婆羅門多饒財寶長者居士大富商主施者施主知我行施定當恭敬尊重讚歎供養於我故行惠施又不狹劣而行惠施謂財雖少尚廣心施何況財多又不誑他而行惠施謂先於彼少行惠施令起愛著令親附已然後傾減又復不爲乖

離於他而行惠施謂我以施乖離村邑村邑一分乖
離國土國土一分令背其主而來屬我又諸菩薩翹
勤無情起策具足勇銳自嚴先自行施後勸他施非
自懈怠策他勤施又無量衆同集來乞如實了知持
戒犯戒隨其長幼以次而坐從上至下周旋往返窮
諸施物分布與之又諸菩薩現有無量廣多財物終
不行於有量之施又諸菩薩不損惱他而行惠施謂
不訶罵捶打恐怖毀辱縛害拘禁所刺驅擯於此而
施於彼又諸菩薩施前意悅施時心淨施後無悔又
諸菩薩不以諂詭而行惠施謂終不以非實末尼真

珠瑠璃珂貝璧玉珊瑚等寶而施希望真實寶者又
諸菩薩所有財物若少若多無不運心先施一切後
來求者如取自財菩薩與時如還彼物又諸菩薩應
時而施不以非時自他淨施非不清淨合儀而施不
以非儀無亂心施不以散亂又諸菩薩見來求者終
不嗤笑亦不輕弄亦不令其面生赧愧亦不顰蹙舒
顏平視前笑先言終不稽留疾疾而施又諸菩薩他
雖不求自恣求者必有所求稱須而與常開求者歡
情自取又諸菩薩不以惡慧而行布施常以巧慧而
行布施云何菩薩巧慧布施謂諸菩薩現有種種可

施財物求者未至先發是心設二求者俱來我所一
是安樂非貧非賤有依有怙二是危苦是貧是賤無
依無怙我於爾時應自揆量所有財物若堪於二克
足滿願卽應俱施滿願充足如其財物不堪於二克
已所有施彼危苦是貧是賤無依無怙發是心已如
所思惟卽便成辦如是事業於安樂等諸來求者既
無力能足滿其願先當方便發意思惟辭謝發遣我
此施物於危苦等先捨先許故令與之非我於汝無
樂施心但更無力唯願賢者勿於我所嫌恨棄背又

諸菩薩現有種種可施財物知有慳家最極慳家各
執財寶慳固兢戰於其家中曾未惠施一切沙門婆
羅門等菩薩卽便往詣其舍慰問安不恭順方便告
言汝來我不令汝庫藏減盡而於現前作大饒益我
家現有廣多財寶廣多施物爲滿我施波羅蜜多若
有求者來到汝所勿令空返可至我家取諸財寶隨
意施與或有求者來至我所我行施時汝於此施當
生隨喜彼聞是已便生欣悅於我庫藏既無所減復
得稱彼善男子心故應隨順成辦所作菩薩如是令
彼漸種當來調伏慳吝種子由慧爲先善巧方便令

漸修習自捨少財依下無貪進得中品依中無貪進得上品又諸菩薩若親教師及軌範師共住弟子同梵行者性是慳貪是慳貪類或性雖非慳貪種類而闕資財所欲匱乏菩薩欲寄佛法僧田樹修布施福業事時捨所施物與彼令作已自不爲菩薩如是巧慧方便自所生福彌更弘多復令一類同梵行者調伏所有慳貪煩惱亦令一類樂善法者所願滿足攝受有情成就有情又諸菩薩現有衆多可施財物見諸來者有希求相知其心已隨彼所樂悉皆施與復有商人爲性矯詐欲行欺誑菩薩知已尚掩其過不

令他知况觸於彼稱滿其願令無羞慚踊躍無畏歡喜而去復有矯詐欺誑菩薩初不覺知後時乃覺雖復覺知不以此事舉發彼人亦不訶責爲作憶念但生悲愍彼於我所悞行如是不與取事我今隨喜令彼無罪如是等類當知名爲菩薩現有可施財物巧慧而施又諸菩薩若現無有可施財物先所串習彼彼世間工巧業處作意現前少用功力多集財寶施諸衆生是諸菩薩或復爲他種種美妙善巧言詞宣說正法令貧苦者尚樂行施況富樂者令慳貪者猶能惠施況習施者或有淨信多饒財寶常樂施家數

教乞者往彼求索令其布施或彼惠捨修福業時躬詣其所翹勤無惰起策具足深心歡喜隨力隨能身助語助令施求者得善滿足以彼施時事力闕虧或惡供贍或墮朋黨或不恭敬或念忘失由善助故斯過皆無如是菩薩現無財寶巧慧方便而行布施此說乃至未證增上清淨意樂若諸菩薩已證增上清淨意樂如已獲得超諸惡趣如是生生必定獲得無盡財寶又諸菩薩終不口授求過外道所有正法亦不施彼所寫經典知性多貪求欲銜賣經卷等者亦不施與知欲祕藏亦不施與不求勝智亦不施與必

求勝智若自了知於經卷等其義已辨卽隨所樂如應施與若自了知於經卷等其義未辨爲辨義故恒自披轉如是菩薩若見其餘有經卷等卽應方便轉求施與或更書寫而施與之若不見餘有經卷等亦無力能更爲書寫卽應審諦觀察自心勿我於法慳垢纏心不能施耶勿我於法別意所礙不欲施耶爲我於法有勝所須不應施耶如是審諦觀察心已若自了知我於此法少有慳纏別意所礙而不施者卽作是念我今決定應行法施設我由此行法施故於現法中卽成癡癡不忍煩惱尚應法施況令闕乏妙

智資糧又觀察已若自了知我於此法無少慳纏亦無別意但爲成辦勝所須義不應施者菩薩爾時應更思忖我持此法施於彼者爲爲損害自煩惱耶爲爲圓滿智資糧耶爲爲愛念諸衆生耶既思忖已便正了知我都不見自有煩惱見不施彼此經卷等現法當來我智資糧展轉增勝非施於彼建此功德但於當來薄饒法利非豐覺慧若不施彼便能修集利益安樂一切衆生巧方便智卽爲愛念此一衆生及餘一切若施於彼唯成愛念此一衆生非餘一切菩薩如是如實知已不施彼者無罪無悔亦不違越菩薩

淨戒云何菩薩方便不施謂諸菩薩不忍直言遣來求者謂我不能惠施於汝要當施設方便善巧曉喻發遣云何施設方便善巧謂諸菩薩先於所畜一切資具一切施物爲作淨故以淨意樂捨與十方諸佛菩薩譬如苾芻於已衣物爲作淨故捨與親教軌範師等如是菩薩淨施因緣雖復貯畜種種上妙一切資具一切施物猶得名爲安住聖種生無量福常於此福多思惟故於一切時隨逐增長恒於一切作淨施物如佛菩薩所寄護持見來求者卽應觀察若隨所欲作淨施物惠施彼時稱當正理應作是念諸

佛菩薩無有少物於諸衆生而不施者如是知已取
淨施物施來求者令所願滿若觀施時不稱正理卽
應念先作淨施法告言賢首如是等物是他所有不
許施汝輒言曉喻方便發遣或持餘物二倍三倍恭
敬施與然後發遣令彼了知菩薩於此非慳貪故不
欲施我定當於此經卷等法不自在故不施於我當
知是名菩薩巧慧而行法施又諸菩薩於一切施謂
法施財施無畏施若異門若體相若釋名若因果差
別如實了知而行惠施當知亦名菩薩巧慧而行布
施又諸菩薩於諸有怨以慈意樂而行惠施於諸有

苦以悲意樂而行惠施於諸有德以喜意樂而行惠
施於諸有恩親善同意以捨意樂而行惠施當知亦
名菩薩巧慧而行布施又諸菩薩於其施障及彼對
治如實了知此中施障略有四種一先未串習二施
物尠闕三耽著上妙悅意財物四觀見當來具足財
果而深欣樂若諸菩薩現有種種可施財物雖見求
者正現在前而於惠施心不趣入菩薩爾時卽以正
慧速疾通達是我於施先未串習所作過失復以妙
慧如是通達我於先世決定於施曾未串習致令今
世現有種種可施財物雖見求者正現在前而於惠

施心不趣入若於今世不彊思擇而行施者復於來世定當憎背所應行施菩薩如是正通達已用此施障對治爲依力勵思擇而行惠施能不隨逐先未串習所作過失自在而行又諸菩薩若見求者正現在前由諸財物有虧闕故於其惠施心不趣入菩薩爾時卽以正慧速疾通達如是匱乏障施因緣忍受匱乏所作衆苦力勵思擇起悲愍心而行惠施作如是念或由宿業有過失故或由現在繫屬他故今我具受衆多猛利飢渴等苦不能饒益一切衆生設我今者由行惠施因饒益他於現法中受種種苦乃至殞

歿如是行施猶爲最勝非空發遣諸來求者況當更有諸菜葉等可以活命菩薩如是忍受匱乏所作衆苦而行惠施又諸菩薩若見求者正現在前由可施物極悅意故最上妙故於行惠施心不趣入菩薩爾時卽以正慧速疾通達是我耽著所作過失我今於苦發起虛妄樂想顛倒由此能生當來衆苦於此顛倒徧了知故爲欲斷除力勵思擇用此財物而行惠施又諸菩薩若行施已於當施果廣大財利見勝功德深生欣樂不求無上正等菩提菩薩爾時卽以正慧速疾通達是邪果見所作過失如實觀察一切諸

行皆不堅牢一切諸行皆念念滅所受用果速疾滅盡速疾離散如是觀時卽能斷滅能生欣樂邪果之見諸所行施一切迴向無上菩提如是菩薩四種施障當知四種能對治智對治於彼一者覺悟二者忍受衆苦三者徧知顛倒四者見一切行性不堅牢是諸菩薩由前三種能對治智決定堪能正行惠施由後一種能對治智能正攝受施福勝果當知亦名菩薩巧慧而行布施又諸菩薩內居閑靜由淨意樂淳厚淨信分別勝解數數緣念種種上妙無量財寶以勝解力於諸衆生樂行惠施由此因緣是諸菩薩以

少功用生無量福當知亦名菩薩巧慧而行布施如是妙慧大慧菩薩巧慧行施總略義者由有財無財財施所攝故如是由法施故由無礙解施故由勝意樂施故由施障對治智施故由增上意樂勝解施故當知是名唯諸菩薩不共行施如是廣說於內外事菩薩所行一切施差別相已自斯已後卽於一切施差別相中分出所餘難行施等一切差別應當了知云何菩薩難行施當知此施略有三種謂若諸菩薩財物少自忍貧苦惠施於他是名菩薩第一難行施若諸菩薩所可受物或性深愛著或長時串習或

有上品恩或最上妙物極生耽著能自開解惠施於他是名菩薩第二難行施若諸菩薩極大艱辛所獲財物惠施於他是名菩薩第三難行施云何菩薩一切門施當知此施略有四相謂諸菩薩或自財物或勸化他所得財物或施親屬父母妻子奴婢作使善友大臣親戚眷屬或復施與他來求者如是四相是名菩薩一切門施云何菩薩善士所行各善士施當知此施略有五相謂諸菩薩淨信而施恭敬而施自手而施應時而施不損惱他而行惠施如是五相是名菩薩善士所行各善士施云何菩薩一切種施當

知此施有十三相一無依施二廣大施三歡喜施四數數施五田器施六非田器施七一切物施八一切處施九一切時施十無罪施十一有情物施十二方土物施十三財穀物施如是十三種相當知是名菩薩一切種施云何菩薩遂求施當知此施有八種相謂諸菩薩匱乏飲食而求乞者施以飲食匱乏車乘而求乞者施以車乘匱乏衣服而求乞者施以衣服匱乏嚴具而求乞者施以嚴具匱乏種種資生什物而求乞者施以種種資生什物匱乏種種塗飾香鬘而求乞者施以種種塗飾香鬘

施以舍宅匱乏光明而求乞者施以光明如是八相
是名菩薩遂求施云何菩薩此世他世樂施當知此
施略有九相謂財施無畏施法施總說名爲能令衆
生此世他世樂施財施者謂以上妙清淨如法財物
而行惠施調伏慳悋垢而行惠施調伏積藏垢而行
惠施調伏慳悋垢者謂捨財物執著調伏積藏垢者
謂捨受用執著無畏施者謂濟拔師子虎狼鬼魅等
畏拔濟王賊等畏拔濟水火等畏法施者謂無倒說
法稱理說法勸修學處如是一切總說九相是名菩
薩能令衆生此世他世樂施此中財施無畏施及此

差別能令衆生此世安樂法施及差別能令衆生後
世安樂云何菩薩清淨施當知此施有十種相一不
留滯施二不執取施三不積聚施四不高舉施五無
所依施六不退弱施七不下劣施八無向背施九不
望報恩施十不希異熟施云何不畱滯施謂諸菩薩
見來求者正現在前速疾惠施不作畱滯非來求者
疾望得財如諸菩薩速希惠施云何不執取施謂諸
菩薩不以妄見執取於施或執此施空無有果或執
殺害而行惠施以爲正法或執唯施極淨圓滿是世
出究竟清淨云何不積聚施謂諸菩薩不於長時漸

漸積集聚多財物然後頓施何以故非諸菩薩現有
施物見來求者正現在前堪能不施不見不施是稱
正理云何積財而不速施又諸菩薩不見積財後方
頓施是能生長多福之門又正觀見若別若總求者
相似漸施頓施財物平等何緣而執福有差別又諸
菩薩見積聚施其施有罪見隨得施其施無罪何以
故若積聚已然後頓施是則先時有來求者其數或
百而不施與令生嫌恨不忍不信後有一類或不希
求蓄積珍財彊而頓施是故菩薩不積聚施云何不
高舉施謂諸菩薩於來求者謙下心施亦不與他競

勝而施亦不施已而生憍慢謂我能施我是施主餘
則不爾云何無所依施謂諸菩薩不依稱譽聲頌而
施體逢世間稱譽聲頌虛妄分別文字所起唯是虛
音繫屬妄響譬如世間稍麩葉聚云何不退弱施謂
諸菩薩施先意悅施時心淨施已無悔聞諸菩薩廣
大第一最勝施時不自輕懷恐怖退弱云何不下劣
施謂諸菩薩於諸施物勤數簡擇最勝最妙飲食車
乘衣服等物持用布施云何不向背施謂諸菩薩其
心平等不隨朋黨於怨親中悲心等施云何不希望
恩施謂諸菩薩悲心愍心而行惠施終不於他希望

反報但觀求樂愛火所燒無有勢力性苦衆生深心
悲愍而行惠施云何不希異熟施謂諸菩薩修行惠
施終不希望當來所得財寶圓滿自身圓滿施果異
熟觀一切行性是虛僞觀大菩提最勝功德由此十
相菩薩所行布施清淨最極清淨如是菩薩依止九
相所行惠施圓滿施波羅蜜多已能證無上正等菩
提

瑜伽師地論卷第三十九

音釋

媒媾

媒莫杯切媾古候切

罩

陟敎切捕魚器也

毘羶

毘羶邪切

龜網也 玃其亮切

饑

街切

毆

烏后切

施器於道曰玃

撓

爾沼切

撩擲

撩蓮條切挑弄也

澗他計切

啗

赤脂切

靱

渠亮切

唾湯臥切

街賣

街黃絹切街賣也

付

倉本切

也

稍

稍公切

稍

稍公切

丹陽居士賀學易施資刻此
金臺普安寺沙門
伽師地論第三十九卷
長洲徐普書
進賢傅汝禎刻
萬曆己亥春三月徑山寂暎庵識

5
6
7
8
9
80
1
2
3
4
5
6
7
8
9
90
1
2
3
4
5
6
7
8
9
100
1
2
3
4
5

瑜伽師地論卷第四十九

瑜伽師地論卷第四十

彌勒菩薩說

唐三藏沙門玄奘奉詔譯

本地分中菩薩地

初持瑜伽處戒品第十之一

云何菩薩戒波羅蜜多 唵 柁南曰

自性一切難 一切門善士 一切種遂求

二世樂清淨 如是九種相 是名略說戒

謂九種相戒名為菩薩戒波羅蜜多 一自性戒 二一

切戒 三難行戒 四一切門戒 五善士戒 六一切種戒

公函

瑜伽師地論卷第四十

一

記十

七遂求戒八此世他世樂戒九清淨戒云何菩薩自性戒謂若略說具四功德當知是名菩薩自性戒何等爲四一從他正受二善淨意樂三犯已還淨四深敬專念無有違犯由諸菩薩從他正受故於所學戒若有違犯卽外觀他深生愧恥由諸菩薩善淨意樂故於所學戒若有違犯卽內自顧深起慙羞由諸菩薩於諸學處犯已還淨深敬專念初無違犯二因緣故離諸惡作如是菩薩從他正受善淨意樂爲依止故生起慚愧由慚愧故能善防護所受尸羅由善防護所受戒故離諸惡作又於是中從他正受善淨意

樂此二是法犯已還淨深敬專念無有違犯此二是前二法所引又於是中從他正受善淨意樂深敬專念無有違犯由此三法應知能令不毀菩薩所受淨戒犯已還淨由此一法應知能令犯已還出如是菩薩具四功德自性尸羅應知卽是妙善淨戒正受隨學能利自他利益安樂無量衆生哀愍世間諸天人等令得義利利益安樂故應知卽是無量淨戒攝受無量菩薩所學故應知卽是饒益一切有情淨戒現前能作一切有情利益安樂故應知卽是能獲大果勝利淨戒攝受隨與無上正等菩提果故是名菩薩



自性戒云何菩薩一切戒謂菩薩戒略有二種一在家分戒二出家分戒是名一切戒又卽依此在家出家二分淨戒略說三種一律儀戒二攝善法戒三饒益有情戒律儀戒者謂諸菩薩所受七衆別解脫律儀卽是苾芻戒苾芻尼戒正學戒勤策戒勤策女戒近事男戒近事女戒如是七種依止在家出家二分如應當知是名菩薩律儀戒攝善法戒者謂諸菩薩受律儀戒後所有一切爲大菩提由身語意積集諸善總說名爲攝善法戒此復云何謂諸菩薩依戒住戒於聞於思於修止觀於樂獨處精勤修學如是時

時於諸尊長精勤修習合掌起迎問訊禮拜恭敬之業卽於尊長勤修敬事於疾病者悲愍殷重瞻侍供給於諸妙說施以善哉於有功德補特伽羅真誠讚美於十方界一切有情一切福業以勝意樂起淨信心發言隨喜於他所作一切違犯思擇安忍以身語意已作未作一切善根迴向無上正等菩提時時發起種種正願以一切種上妙供具供佛法僧於諸善品恒常勇猛精進修習於身語意住不放逸於諸學處正念正知正行防守密護根門於食知量初夜後夜常修恬寤親近善士依止善友於自憊犯審諦了

知深見過失既審了知深見過已其未犯者專意護持其已犯者於佛菩薩同法者所至心發露如法悔除如是等類所有引攝護持增長諸善法戒是名菩薩攝善法戒云何菩薩饒益有情戒當知此戒略有十一相何等十一謂諸菩薩於諸有情能引義利彼彼事業與作助伴於諸有情隨所生起疾病等苦瞻侍病等亦作助伴又諸菩薩依世出世種種義利能爲有情說諸法要先方便說先如理說後令獲得彼彼義利又諸菩薩於先有恩諸有情所善守知恩隨其所應現前酬報又諸菩薩於墮種種師子虎狼鬼

魅王賊水火等畏諸有情類皆能救護令離如是諸怖畏處又諸菩薩於諸喪失財寶親屬諸有情類善爲開解令離愁憂又諸菩薩於有匱乏資生衆具諸有情類施與一切資生衆具又諸菩薩隨順道理正與依止如法御衆又諸菩薩隨順世間事務言說呼召去來談論慶慰隨時往赴從他受取飲食等事以要言之遠離一切能引無義違意現行於所餘事心皆隨轉又諸菩薩若隱若露顯示所有真實功德令諸有情歡喜進學又諸菩薩於有過者內懷親昵利益安樂增上意樂調伏訶責治罰驅擯爲欲令其出

論
瓊伽師地持卷四
四
房十
不善處安置善處又諸菩薩以神通力方便示現那
落迦等諸趣等相令諸有情厭離不善方便引令入
佛聖教歡喜信樂生希有心勤修正行云何菩薩住
律儀戒住攝善法戒住饒益有情戒善護律儀戒善
修攝善法戒善行一切種饒益有情戒謂諸菩薩住
別解脫律儀戒時捨轉輪王而出家已不顧王位如
棄草穢如有貧賤爲活命故棄下劣欲而出家已不
顧劣欲不如菩薩清淨意樂捨轉輪王位而出家已
不顧一切人中最勝轉輪王欲又諸菩薩住律儀戒
於未來世天魔王宮所有妙欲不生喜樂亦不願求

彼諸妙欲修行梵行於彼妙欲尚如實觀猶如趣入
廣大種種恐畏稠林況餘諸欲又諸菩薩既出家已
於現在世尊貴有情種種上妙利養恭敬正慧審觀
尚如變吐曾不味著何況於餘卑賤有情所有下劣
利養恭敬又諸菩薩常樂遠離若獨靜處若在衆中
於一切時心專遠離寂靜而住不唯於是尸羅律儀
而生喜足依戒住戒勤修無量菩薩等持爲欲引發
證得自在又諸菩薩雖處雜衆而不樂爲乃至少分
不正言語居遠離處不起少分諸惡尋思或時失念
暫爾現行尋便發起猛利悔愧深見其過數數悔愧

深見過故雖復暫起不正言論諸惡尋思而能速疾安住正念於彼獲得無復作心由此因緣則能拘檢習拘檢故漸能如昔於彼現行深生喜樂於今安住彼不現行喜樂亦爾又能違逆令不現起又諸菩薩於諸菩薩一切學處及聞已入大地菩薩廣大無量不可思議長時最極難行學處心無驚懼亦不怯劣唯作是念彼既是人漸次修學於諸菩薩一切學處廣大無量不可思議淨身語等諸律儀戒成就圓滿我亦是人漸次修學決定無疑當得如彼淨身語等諸律儀戒成就圓滿又諸菩薩住律儀戒常察已過

不伺他非普於一切凶暴犯戒諸有情所無損害心無瞋恚心菩薩於彼由懷上品法大悲故現前發起深憐愍心欲饒益心又諸菩薩住律儀戒雖復遭他手足塊石刀杖等觸之所加害於彼尚無少恚恨心況當於彼欲出惡言欲行加害況復發言毀辱訶責以少苦觸作不饒益又諸菩薩住律儀戒具足成就五支所攝不放逸行一前際俱行不放逸行二後際俱行不放逸行三中際俱行不放逸行四先時所作不放逸行五俱時隨行不放逸行謂諸菩薩於菩薩學正修學時若於過去已所違犯如法悔除是名菩

論
釋迦阿地論卷四十一
薩前際俱行不放逸行若於未來當所違犯如法悔
除是名菩薩後際俱行不放逸行若於現在正所違
犯如法悔除是名菩薩中際俱行不放逸行若諸菩
薩先於後時當所違犯發起猛利自誓欲樂謂我定
當如如所應行如如所應住如是如是行如是如是
住今無所犯是名菩薩先時所作不放逸行若諸菩
薩卽以如是先時所作不放逸行爲所依止如如所
應行如如所應住如是如是行如是如是住不起毀
犯是名菩薩俱時隨行不放逸行又諸菩薩住律儀
戒覆藏自善發露已惡少欲喜足堪忍衆苦性無憂

感不掉不躁威儀寂靜離矯詐等一切能起邪命之
法菩薩成就如是十支名住律儀戒善護律儀戒謂
不顧戀過去諸欲又不希求未來諸欲又不耽著現
在諸欲又樂遠離不生喜足又能掃滌不正言論諸
惡尋思又能於已不自輕憊又性柔和又能堪忍又
不放逸又能具足軌則淨命又諸菩薩已能安住攝
善法戒若於身財少生顧戀尚不忍受何況其多又
於一切犯戒因緣根本煩惱少分煩惱忿恨等生亦
不忍受又於他所發生恚害怨恨等心亦不忍受又
於所起懈怠懶惰亦不忍受又於所起等至味著等

至煩惱亦不忍受又於五處如實了知謂如實知善果勝利又能如實了知善因又能如實知善因果倒與無倒又如實知攝善法障是諸菩薩能於善果見大勝利尋求善因為攝善故如實了知倒與無倒由此菩薩獲得善果不於無常妄見爲常不於其苦妄見爲樂不於不淨妄見爲淨不於無我妄見爲我如實了知攝善法障爲攝善故速疾遠離菩薩由此十種相故名住攝善法戒速能攝善一切種相謂施漸次若戒漸次若忍漸次若精進漸次若靜慮漸次及五種慧又諸菩薩由十一相名住一切種饒益有情

戒於一一相中成就一切種謂諸菩薩於諸有情彼彼事業皆爲助伴謂於思量所作事業及於功用所作事業悉能與彼而作助伴或於道路若往若來或於無倒事業加行或於守護所有財物或於和合展轉乖離或於義會或於修福皆爲助伴於諸救苦亦爲助伴謂於遭遇疾疫有情瞻侍供給盲者啓導聾者搗義手代言者曉以相像迷方路者示以隅途支不具者惠以荷乘其愚駮者誨以勝慧爲貪欲纏所苦有情開解令離貪欲纏苦如是若爲瞋恚惛沈睡眠掉舉惡作疑纏所苦有情開解令離疑纏等苦欲

尋思纏所苦有情開解令離欲尋思苦如欲尋思恚
害親里國土不死輕侮相應族姓相應所有尋思當
知亦爾他蔑他勝所苦有情開解令離被蔑勝苦行
路疲乏所苦有情施座施處調身按摩令其止息勞
倦衆苦又諸菩薩爲諸有情如理宣說謂於樂行惡
行有情爲欲令斷諸惡行故以相應文句助伴隨順
清亮有用相稱應順常委分資糧法而爲宣說或復
方便善巧宣說如於樂行惡行有情爲欲令斷諸惡
行故如是於行慳行有情爲欲令彼斷慳行故於現
法中求財寶者爲欲令彼正少功力集多財寶守護

無失於佛聖教懷憎嫉者爲欲令彼得清淨信證清
淨見超諸惡趣盡一切結越一切苦應知亦爾又諸
菩薩於其有恩諸有情所深知恩惠常思酬報暫見
申敬讚言善來怡顏歡慰吐誠談諺詳處設座正延
令坐若等若增財利供養現前酬答非以下劣於彼
事業雖不求請尚應伴助况乎有命如於事業如是
於苦於如理說於方便說於濟怖畏於衰惱處開解
愁憂於惠資糧於與依止於隨心轉於顯實德令深
歡悅於懷親愛方便調伏於現神通驚恐引攝如應
廣說當知亦爾又諸菩薩於遭怖畏諸有情類能爲

救護謂於種種禽獸水火王賊怨敵家主宰官不活
惡名大衆威德非人起屍魍魎等畏皆能救護令得
安隱又諸菩薩於處衰惱諸有情類能善開解令離
愁憂或依親屬有所衰亡所謂父母兄弟妻子奴婢
僮僕宗長朋友內外族因親教軌範及餘尊重時有
喪亾善爲開解令離憂惱或依財寶有所喪失謂或
王賊之所侵奪或人所燒或水所溺或爲矯詐之所
誑誘或由事業無方損失或爲惡親非理橫取或家
失火之所耗費於如是等財寶喪失善爲開解令離
憂惱由是因緣諸有情類生輒中上三品愁憂菩薩

皆能正爲開解又諸菩薩備資生具隨有來求卽皆
施與謂諸有情求食與食求飲與飲求乘與乘求衣
與衣求莊嚴具與莊嚴具求諸什物施以什物求鬘
塗香施鬘塗香求止憩處施止憩處求諸光明施以
光明又諸菩薩性好攝受諸有情類如法御衆方便
饒益以無染心先與依止以憐愍心現作饒益然後
給施如法衣服飲食臥具病緣醫藥資身什物若自
無有應從淨信長者居士婆羅門等求索與之於已
以法所獲如法衣服飲食諸坐臥具病緣醫藥資身
什物與衆同用自無隱費於時時間以其隨順八種

教授而正教授五種教誡而正教誡此中所說教授
教誡當知如前力種性品已廣分別又諸菩薩於有
情心性好隨轉隨心轉時先知有情若體若性知體
性已隨諸有情所應共住卽應如是與其共住隨諸
有情所應同行卽應如是與彼同行若諸菩薩欲隨
所先有情心轉當審觀察若於如是如是相事現行
身語生他憂苦如是憂苦若不令其出不善處安立
善處菩薩爾時於如是事現行身語護彼心故方便
思擇勵力遮止令不現行如是憂苦若能令其出不
善處安立善處菩薩爾時於如是事現行身語住哀

愍心不隨如有情心轉方便思擇勵力策發要令
現行復審觀察若於如是有情事現行身語令餘
有情發生憂苦如是憂苦若不令他或餘有情或不
令二出不善處安立善處菩薩爾時於如是事現行
身語護餘心故方便思擇勵力遮止令不現行如是
憂苦若能令他或餘有情或能令二出不善處安立
善處菩薩爾時於如是事現行身語住哀愍心不隨
如是有情心轉方便思擇勵力策發要令現行復審
觀察若於如是菩薩自事現行身語生他憂苦如是
現行身語二業非諸菩薩學處所攝不順福德智慧

論
資糧如是憂苦不能令他出不善處安立善處菩薩
爾時於如是事現行身語護他心故方便思擇勵力
遮止令不現行與此相違現行身語如前應知如生
憂苦如是廣說生於喜樂隨其所應當知亦爾又隨
他心而轉菩薩知他有情忿纏所纏現前忿纏難可
捨離尚不讚歎何況毀訾卽於此時亦不諫誨又隨
他心而轉菩薩他雖不來談論慶慰尚應自往談論
慶慰何況彼來而不酬報又隨他心而轉菩薩終不
故意惱觸於他唯除訶責諸犯過者起慈悲心諸根
寂靜如應訶責令其調伏又隨他心而轉菩薩終不

論
喘謂輕弄於他令其赧愧不安隱住亦不令他心生
憂悔雖能摧伏得勝於彼而不彰其墮在負處彼雖
淨信生於謙下終不現相而起自高又隨他心而轉
菩薩於諸有情非不親近不極親近亦不非時而相
親近又隨他心而轉菩薩終不現前毀他所愛亦不
現前讚他非愛非情交者不吐實誠不屢希望知量
而受若先許他應飲食等終無假託不赴先祈爲性
謙沖如法曉喻又諸菩薩性好讚揚真實功德令他
歡喜於信功德具足者前讚揚信德令其歡喜於戒
功德具足者前讚揚戒德令其歡喜於聞功德具足

者前讚揚聞德令其歡喜於捨功德具足者前讚揚捨德令其歡喜於慧功德具足者前讚揚慧德令其歡喜又諸菩薩性好悲愍以調伏法調伏有情若諸有情有下品過下品犯內懷親愛無損惱心以輕訶責而訶責之若諸有情有中品過中品違犯內懷親愛無損惱心以中訶責而訶責之若諸有情有上品過上品違犯內懷親愛無損惱心以上訶責而訶責之如訶責法治罰亦爾若諸有情有下中品應可驅擯過失違犯菩薩爾時爲教誡彼及餘有情以憐愍心及利益心權時驅擯後還攝受若諸有情有其

上品應可驅擯過失違犯菩薩爾時盡壽驅擯不與共住不同受用憐愍彼故不還攝受勿令其人於佛聖教多攝非福又爲教誡利餘有情又諸菩薩爲欲饒益諸有情故現神通力或爲恐怖或爲引攝謂爲樂行諸惡行者方便示現種種惡行諸果異熟謂諸惡趣小邪落迦大邪落迦寒邪落迦獨邪落迦旣示現已而告之言汝當觀此先於人中造作增長諸惡行故今受如是最極暴惡辛楚非愛苦果異熟彼見是已恐怖猷患離諸惡行復有一類無信有情菩薩衆中隨事故問彼作異思拒而不答菩薩爾時或便

化作執金剛神或復化作壯色大身巨力藥叉令其
恐怖由是因緣捨慢生信恭敬正答其餘大眾聞彼
正答亦皆調伏或現種種神通變化或一爲多或多
爲一或以其身穿過石壁山巖等障往還無礙如是
廣說乃至梵世身自在轉現無量種種神變差別或復
現入火界定等或復示現共聲聞等種種神通方便
引攝令諸有情踊躍歡喜諸未信者方便安處信具
足中諸犯戒者方便安處戒具足中諸少聞者方便
安處聞具足中多慳吝者方便安處捨具足中諸惡
慧者方便安處慧具足中如是菩薩成就一切種饒